


XEENI AKELAKA

OKHALA AMAKAMPUUSI

 ...Kinoona wira, mulaleyi a masasu ooreerela. Ni oohisoma, miyo—miyo kinoona wira nkinkhala ntoko mulaleyi w'atthu amosa-amosa. Ni miyo—miyo hata nkinihimya wira ka mulaleyi, kiri ntoko epenewu yoowuureliwa. Masi kinnoona wira kookhalana Mutthaka onikhuma wa Muluku, wira mwa enamuna aka (ekhanle enamuna emosa paahi erinaaka yo osuweliha Yoowo), kimpavela osuweliha Yoowo olumwenku. Ni kahaakhanle ni Mutthak'owo, kaamukhala mulipa-oothepya wa Muluku ni namirima miili wa nyuwo. Mutthu onrowa ohimya etthu emosa nave waamini ekina, eyo enamirima miili. Nihaana kweekwe olavula ekeekhai ya mmurimani mwahu. Wira atthu yaaniwehaka, hata ehiiraanaka ni hiyo, ninthuna nikhaleke alopwana ni athiyana oottittimiheya: nilavuleke okhuma mmurimani mwahu, ele ekhanle ekeekhai mmurimani mwahu.

² Mwaisana, wala mwaisuri, kaahikhalana mureerelo w'olavula mu—muKristu...wala kileveleliwe, mutthaka wa Natale, wenna oRamada. Ni kookupali wira kaahilavula mwaha wa, kiireke oPhoenix, mwaha wa: *Xeeni Okhala Petelehemu Mwaamukhaani?* Ni kookupali nto wira waari wenna, mwaisana, kaalavunle aka mwaha wa: *Hiyo Nirimoona Ettheneeri Awe Onikhuma nsuwa Nto Nirweenle Omukokhorela.*

³ Ni, moosuwela, hiyo ninnimusoma Bibilia, ni ninniikoha, iya "*Mwaha wa xeeni?*" Nto ohiy'ula miyo kihuupuwela, nyuwo mwavilela-ru ni miyo okathi vakhani, ni nvekela ni miyo, kaamphavela woovahani mutthaka aka wa Natale. Muluku paahi t'onsuwela onrowaahu okhala Natale onrwa, vakhalaru wira ookhala Natale nuumala ola. Tivo okhalaka wira ola pooti okhala Natale ookiserya ninkhalaahu vamosa, mpakha nikilaathi vameesa makina, ni owo khonrowa okhala ntoko ola, masi onrowa okhala okathi onrowaahu olya ni owurya Ekomunyawu emaara ekina ni Yoowo, Momweneni mw'Atithi wookiseryani w'ephiro, vano nto nrowe naattamele ohiy'ula ntoko wira ola waari mutthaka wookiserya wa Natale onrowaahu okilaathi vamosa, ni exariya yoowiixeryaxa.

⁴ Kintthuna kilavule ohiy'ula mwaha woohilimaleleya, masi imaara sikina nyuwo munimphwanya Muluku mwa etthu yoohilimaleleya. Owo onniira itthu mwa enamuna yoohilimaleleya. Kahi enamuna yoolimaleleya, ti

enamuna yoohilimaleleya, okathi woohilimaleleya, mapuro oohilimaleleya, Owo t'ohilimaleleya. Ni kintthuna ela... Apwiya yatthuna vale, kintthuna kilavule mwaha wa: *Xeeni Akelaka Okhala Amakampuusi.*

⁵ Nto vano nihinatthi waattamela Masu, yaawo kinaamini aka wira Mulukuu, “Wopaceryani naari Nsu, nto Nsu naari ni Muluku, ni Nsu naari Muluku. Vano Nsu naahiipaka erutthu khukhala ni hiyo.”

⁶ Ntoko sihimaly'aka, esumana evinre, wala esumana ehinatthi ele evinre oPhoenix, “Ehooniheriwa wira aakhala atthu a elapo ela ya vathi, atthu, anvira emp'ela naanaano va.” Televisawu ennooniheriya yeeyo. Eniireya mukhalelo mukina, maitho ahu eephattu ni miyoonelo sahu mithanu khasinwerya ovara eyo. Kahi wira etelevisawu empaka etthu, eyo enooviriha paahi. Khimukhanle opakaka mweettelo ni ekatha anyu, khimukhanle waaphilaka, ehikaravariwe wa mahiku othene ehoooniheriwa. Khino kaamweemela... Wala mutthu wAustralia, aamukhalana e—eteela ya televisawu nno, kahi yeeyo paahi masi mu—mutthu aamuwerya olavula, ottikinya ekatha awe, waaphila, wala hata nthepa na ikuwo siwanryawe, saamooniheriwa va vaxirini; ni owo wAfrika, Australia, mulaponi mothene. Moone, yookhala erukureryo ya mawipi a eeteri. Nkinwerya oleeliherya, masi koosuwela wira yookhala. Nkikupanli wira mutthu aamuwerya otaphulela vekeekhai. Tivo, etelevisawu enniwerya ovara ela ni okhaliha ekeekhai ni ikaruma kamosa-kamosa, akhanlyaya wooniheryaka vaxirini.

⁷ Vano, etthu emosaru yeeyo yaari muumu okathi Atamu aary'awe muumu. Televisawu yaari muumu okathi—okathi Eliya aakilaanthe—awe Vamwaako Karmelo. Yaari muumu okathi Martinho Lutero, namukuttho ole mmiravo, aarihenle—awe ekomunyawu vathi khwira “Ooxitiya! Ni naxariya onookhala mwaha wo waamini.” Yaari muumu okathi ole, masi hiyo nimphwanya naanaano va. Ni ti siiso, Muluku siryaawe ohoolo wahu ohiy'ula, Malaikha, ookhala a erimu ahinooneya wa moonelo ahu w'ephattu wo wona. Masi nihiku nlo enrowa okhala ekeekhai ntoko etelevisawu ery'aya vano, ni w'atthu othene. Vano, mwaha wa yeeyo kinaamini aka Masu.

⁸ Yesu ohimmye wira, “Ole onrowa waacererya nuulumo nimosa mBibiliani mu, wala okumiha Nuulumo nimosa Mu, mpantte awe onookumihiwa Muliivuruni mw'Ekumi.”

⁹ Tivo, nrowe nuurame muru ahu nto, nihinatthi hata osoma Yaawo. Ti ya nttittimiho saana! Khula mutthu orina ikuru s'erutthu aamuwerya okhunla nikukhu, masi Muluku paahi t'onwerya wuupulula Yaawo.

¹⁰ Nto ni muru ahu wowuuramela vathi vano vaavo okumihiwaahu, ni nihiku nlo ninootthika, kaatthuna

kisuwele...Ni okathi ula woottitimiheya, nimwaattamelaka Natale, yaakhanle-ene amosa-amosa va vekeekhai anoona okhala oohiphwanela ni yaatthuna wuupuweliwa mmavekeloni mu, mwaanitthuna (muhivenxale muru) onvenxerya matata paahi Muluku ni wira, “Mukuupuwele, Pwiya, Natale ola”? Muluku ooreeriheni.

¹¹ Tithi Oowaaryaxa ni Ooreera murima a Wirimu, Muluku Oowerya sothene, Ole aakhanle okhuma wopaceryani, ehinatthi okhala ettheneeri, wala aatomu mmosa, wala emoleekula emosa. Nyuwo mpanke itthu sothene mwa Yesu Kristu Mwan’Nyu, ni moonivaha sothene mahala mwa Yoowo. Hiyo ninnooxukhuruni Nyuwo, ohiy’ula, Pwiya, mwaha w’okathi ula Nyuwo munivahaly’anyu wira nithukumane vamosa, wira nilopoliwe ni oxuttihiwa ni Erooho Yoowaarya. Ni Erooho Yoowaarya t’enikuxa Masu Anyu ni onuupululela Yaawo, maana Yesu ohimnye wira, “Okathi Owo Erooho y’Ekeekhai enrwaaya, Eyo enoowuupuxeryani itthu iya Miyo kihimnye aka ni enoowoonihani itthu sinrwa.”

¹² Muluku, khaavo hata mmosa eriyari ahu, khokhanle hata mmosa elapo ya vathi, omphwanela weererya otaphulela Masu Anyu, maana yolempwa wira, “Masu a Muluku kahi ootaphuleliwa ni mutthu mmansawe.” Tivo, Pwiya, hiyo ninvekela wira Erooho Yoowaarya enivahe ohiy’ula, khula mmosa, epantte nintthunaahu wira emalihe etala ele eri mmurimani mwahu wira neetteke vakhiviruxa ni Nyuwo. Hiyo n’a oohiwerya, ootakhala, oohiphwanela. Mutthuniherye wira Mwaana oyariwe oPeteleheemu, yoowo aakhala makhalelo oomalela oloka, ni aari mutthu oomalela oloka mulaponi, ni oivanhe Mmansawe ntoko evuluxo wira anirapihe hiyo anatampi ootakhala ni oniruuha mopatthanani n’Atithi, munivahe ohiy’ula wira Erooho Yoowaarya Awe (mwaha w’olaleya Masu) eniirele yeeyo hiyo.

¹³ Pwiya Muluku, aakhala aretta anci-ene mulaponi olelo, sinaamwi sikhaneloolelo soolokaxa sa mameetiku, ni mirette soolokaxa ni ixipiritaali soolokaxa. Ni ninaamwi ni ittemulelo sahu sa siyensiya, nnakhala vo sookhalaxa iretta ovikana olumwenku otonko aya osuwela, okhala wira yookhalaxa etampi ni ohaamini ovikana olumwenku otonko aya osuwela. Munikhaliherye ohiy’ula, Meetiku Muulupale, ni mwaavonihe aretta ari eriyari ahu.

¹⁴ Ni munivahe Erooho, Erooho y’eekeekhai ya Natale. Okathi olelo akhalaniwe meera a epakawu, miri sa Natale sinkokhoreliwa, ihantisi s’owuupuweleliwa sa mu—mulopwana mmosa iitthaniwa Paapa Noweli, ni anamarokolo ahu a Paasikha, ni mihapo soohiyana-hiyana olumwenku wa anakoso ophwannye aya, sihiiwe epantte aya, Muluku. Munitthuniherya okela mwa Kristu Masu, maana hiyo ninvekela mwa Nsina Nawe ni wa ovuwa Wawe. Amen.

15 Mwakhunla ni miyo wira nisome mwa Soolempwa Soowaarya, Luka Oowaarya, kapiitulu 2. Munniwerya okiwa saana?

Yookhala evirikanne mmiikoroni? Munniwerya okiwa saana ottuli? Mwaaweryaka vale, nvenxe ntata. Kooxukhuru. Ekapiitulu 2 ya Ehapari yooreera volikana ni Luka Oowaarya.

Nto vaahiiraneya mahiku awo, wira naahikhuma nlamulo wa Kesari Aukusto, wira atthu othene yaahaana orepliwa.

(Nto mpoosito ola woopacerya waasuveliwe . . . anari kuvernatooro a oSiiriya.)

Ni atthu othene yaanirowa orepliwa, khula mutthu elapo awe.

Ni Yosefe aahivenya oKalileya, epooma ya oNasareti, arowaka oYuteya, . . . epooma ya Davidi, oniitthaniwa Peteleheemu; (okhala wira owo aari a etthoko ni nloko na Davidi:)

Wira arepliwe ni Maria mwaar'awe aamwaakamelawe, iira orupanle.

Nto vaahiiraneya, wira, onari weiwo, yaahiphiya mahiku awe ooyara.

Nave owo aahimuyara mwan'awe oopacerya, aahimukhuneela ni ikuwo, khumwaatalela mwaalyelya inama; okhala wira khuwaakhanle opuro mpaani mwaamaka aletto.

Yaahikhala amakampuusi ekuluttu yeeyo yaaviriha ohiyu mmathalani, erupelelaka inama saya.

Nave, nto, nlaikha n'Apwiya naahaakhumelela, ni nttittimiho n'Apwiya naahamwaleela yaawo: vano awo yaanoova vanci-ene.

Vano nlaikha naahaaleela wira, Muhoove: tthiri, moone, kooruuheleni . . . mihupi sooreera s'otteeliha murima, sinrowa okhala s'atthu othene.

Okhala wira mooyareliwa olelo epooma ya Davidi Moopoli, yooowo okhanle Kristu Pwiya.

Nto ela enrowa okhala ekanyeryo wa nyuwo; Munoomphwanya mwaana akhuneeliwe ni ikuwo, aataleliwe mwaalyelya inama.

Nto naanaanoru naahikhala n . . . Nto naanaanoru vale . . . nlaikha ni muttithi wa . . . muttithi wa malaikha a wirimu yaamuttotopela Muluku, yiiraka,

Auwihawe Muluku wirimu-rimu, ni vathi va murettele, atthu onaaphentaawe.

Vano vaahiiraneya, okathi malaikha vaavennyaya vale arowaka wirimu, amakampuuusi yaahileelana yaaworu, Nrowe vano oPeteleheemu, noone etthu ila yiiraneieye, Apwiya anisuwelinhe-aya.

Yaahirwa voowaakuweya, khumphwanya Maria, ni Yosefe, ni mwaana aataleliwe mwaalyeya inama.

Vaamoonale-aya, yaahilaleya saahimeeriwaaya sa mwaana owo.

Ni othene ale yiwale yaahitikinhiwa ni itthu saahimeeriwaaya ni amakampuuusi.

Nave Maria aanisuka itthu iya, atthokelelaka mmurimani mwawe.

Amakampuuusi yaahihokolowa, envuwihaka ni emwiipelaka Muluku mwaha wa itthu sothene siiwalyaya ni soonalyaya, ntoko saahimeeriwaaya.

Apwiya yaacererye iparakha Saya osommwa wa Masu Aya.

¹⁶ Vano, eyo e . . . Mwaha wa xeeni yookhumelela ela yuulupale yuupululeliwaaya amakampuuusi? Eyo yaamukhala etthu yootikiniha vakhani wa hiyo. Kookhalana Soolempwa kamosa-kamosa silempwe va, ni soolepa kamosa-kamosa kinrowaaka ophavela oweha, wira kooleeliheryeni *mwaha* aya voosuwelaxa waka. Ni khino nuumala yeela, wira Apwiya ni mahala Aya, ohiy'ula, anookumiha *mwaha wa xeeni* iyo mwa hiyo. Masi . . . Anci-ene a hiyo, kinoona wira, emaara emosa wala ekina, ninniikohaka mwaha wa xeeni yookhumelela ela yuulupalexa ya okathi wothene yuupululeliwaaya amakampuuusi. Xeeni yuupululeliwaaya amakampuuusi nave khuhikhala mateyooloku a nihiku nle? Awo yaari ale yaaxuttihiwa wira yiiwe Yeeyo. Ni xeeni yarwiiye-aya khimuvira vasulu thaaciri, khimurweela masikhini? Nave-tho, Eyo yaavirenle-ni vasulu asomi ni anamiruku, khwaarweela ale oowiiyeviha ni oohisoma? Sookhala sookoha kamosa-kamosa sa *mwaha wa xeeni* yeela.

¹⁷ Ni mwaha mukina kikhany'aka ohimyaka, nwehe, mwaana owo aayariwe oPeteleheemu. Yeeyo Peteleheemu otaphuleliwa wa eHeperi, ntoko soonalyahu va iyaakha piili sivinre, *Peteleheemu* enihimya “empa ya mukatthe wa Muluku.” Ni hiyo nihooniherya mwa Soolempwa, Owo khaakhanle orwaaka hata nipuro nikina. Peteleheemu okhalihiwe ni Rahapi ni iya—iya awe. Rahapi aari namararuwa mukhulupale a anakhotto aamuuryalaawe, a a—anakhotto a Isarayeli, yaamanlyaya omukuxa Yeriko. Ni mwaha wo waamini owo aahaamini Mutthaka wa Muluku, mwa mukhalelo awe, ni aahoopowa. Nto okhuma weiwo, okathi Yoxuwa aakawaly'awe ilapo sa nipuro khula mmosa aarowaawe okhala, . . .

¹⁸ Ni nookhala nisomi nuulupale okathi owo onwehereryaaka oruuha oTucson, na aximai ale aHeperi yaayaraka aana awo.

Okathi wiipulelaawe mwa owereya wo omuyara mwaana, owo aaromola nsina na mwaana nto eyo yaanimukhaliha vooপুরoni muttethe wa natiri, nihimo nawe. Etthu yuulupale, okhala wira Masu a Muluku othene annilikana oratteene. Yaahilikaneke, kahi Masu a Muluku ahinlikana, ti muupuwelo anyu ohinlikana ni Masu. Awo annilikana oratteene.

¹⁹ Tivo, nto, Owo aari Yolya y'Ekumi, ntoko siixuttihaly'ahu esumana evinre oPhoenix, wala esumana ehinatthi ele evinre. Ni akhalaka Yolya y'Ekumi, Owo khaakhanle orwaaka nipuro nikina woohikhala "*empa ya mukatthe wa Muluku.*" Nto owo waari *mwaha* aya. Vano, va, Yesu oyariwe oPeteleheemu, ni Peteleheemu yaahikhala empa moothukumana, ahooleli aalupale a etiini yaakhala oPeteleheemu. Davidi mwene makampuusi muulupale aayariwe oPeteleheemu, atithi awe Yese yaayariwe oPeteleheemu, apwaapu awe Opeti yaayariwe oPeteleheemu. Nave, okhuma ottuli saana, owo aakhumme oPeteleheemu.

²⁰ Ni va, Yesu Mwaana a Davidi oniyariwa oPeteleheemu, weiwe wene vathi va miyuuttutthi sa ikatetrале суулупале. Nto vakhala wira atthu ale yaari ooxuttihiwa, ni yaahikhala amuwehereryaka Mesiya mwa miyaakha iya sothene; miyaakha ikonto xexe, Mesiya aahilaleeriwa wira aamoorwa. Vano nto vakhala wira Mesiya oyariwe mmuuttutthini wa ekatetrале, xeeni yaarinaaya orowaka ottaiwene saana mmiyaakoni wa nikhuru na amakampuusi oohisuwela etthu, oohisomihiwa wira aruuhe Mutthaka muulupale, Mutthaka woopacerya? Ni waaruma amakampuusi! Kahi a miruku ni oowiixuttihiwa, masi amakampuusi. Eyo etthu yootikiniha, kehiyo? Masi ohaana okhala *mwaha* aya nipuro nlo . . . Wookhala *mwaha*, vano ehaana okhala waakhula *mwaha* aya! Ni khaavo mutthu onsuwela waakhula waya ohikhanle Muluku. Owo ti Ole onsuwela waakhula.

²¹ Vano, muupuwele, Mesiya iira oryeene mpooma, aayariwe mpooma, munikhomani; mpararini mwene wa ikatetraale суулупале weiwo mukhulupale a anamukuttho, ni akhulupale a anamukuttho, ni mateyooloku, ni asuweli, ni ooxuttihiwa, othene yaari weiwo amulipelelaka Mesiya. Ni Owo aari weiwe, eriyari aya yaawo! Masi xeeni nto awo orowa o . . . orowa mmiyaakoni sa oYuteya w'ale oohisuwelaxa, ooxuttihiwa, oohisuwela etthu, oomalela ohaawaxa a othene aya? Aakhala ntoko mutthu oohiphwanela muteko owo, wo wuupulula Mutthaka ni waaruma wira eruuhase Mutthaka.

²² Munnisuwela muupuwelo aka? Pooti ohikhalanaka maana vanci-ene, masi kinthuna ovaha muupuwelo aka: Miyo kinaamini wira *mwaha* wo osuwela wa Muluku, wira Owo aahisuwela wira awo khiyaarowa waakhela Mutthaka enamuna Owo waarwiye-aya. Khuwaalikana ni wiixutta waya. Waari woovirikana. Khuwaari etthu awo yiixuttihiwe-aya

waamini ya moota Owo aarowaawe okhala. Yaari yoovirikana ni osuwela waya wa teyoloxiia. Wiixutta waya wothene, osoma waya wothene waaviriwe vasulu, khuwaamalenle etthu. Kookupali wira waari osuwela wa Muluku waasuwela wira awo khayaarowa waakhela Mutthaka siiso.

²³ Tivo Mesiya aari muumu, ni aahaana okhala mutthu aarowa osuwela Yeeyo. Ni Owo aanaasuwela ale yahiitakaihale ni etthu ntoko eyo. Owo aamuweryaxa ovaha mutthaka Awe nikhuru noohisuwela etthu, ovikana saarowaawe ovaha nikhuru nootakaiheya nahaareere olipana ilimalelo saya vahaakhanle-aya hata etthu yaawerya waarukunxa, nnakhala Masu a Muluku.

²⁴ Nto vano, mpatthani muKristu, mukitthuniherye kikohe ela, ni exariya yothene ni mphento. Kinniikoha vaakhanle wira Owo aamwiira siiso ohiy'ula, ni oniveleeliherya hiyo nloko nla Masu oolaiheriwa alaiheriwe nloko nla, kinniikoha sinto mateyooloku ahu, ni anamasomiha, ni asuweli, khiyaarowa okhoota Mutthaka siiso awo siiraly'aya okathi ule? Mutthu khonrukunuwa, nnakhala Masu a Muluku khanrukunuwa. Owo Muluku ohinrukunuwa, Owo khonrukunuwa!

²⁵ Nwehe, Malaikha yaahirwa ni... Malaikha yaahirwa khwaavaha Mutthaka aya atthu a nukhalelo wa vathixa, nave yaakhanle atthu ootepaxa (wuupuwela wa vathi) oophwanelaxa waavikana amasikhini ala, amakampuusi oohisoma. Makampuusi aari mutthu ootepaxa ohisoma a atthu othene, owo khaaphavela osuwela etthu woohikhala ipwittipwitthi sawe. Owo khaaphavela osuwela matemaatika. Owo khaaphavela osuwela moota wo—wo omukawanya aatomu. Owo khaaphavela osoma. Owo aahaana osuwela ipwittipwitthi sawe paahi, ti yeeyo tu aaphavelaawe osuwela. Ni Muluku, Osuwela wuulupale, ni Ephattuwelo ni vanikhuma osuwela wothene, aamuthanlale mutthu ntoko owo (atthu, kiireke, ntoko awo), ni waavira vasulu othene oosuwela ni oosoma saana yaaxuttihiwe osuwela Yeeyo. Eyo ennilavula etthu, wira awo yaaxuttihiwe vapuwani voohiloka. Aahaavira vasulu ale oosuwanyeyaxa a muttethe; yaahikhala atthu oosuwanyeya, awiixuttihi aalupale, Kaifa mukhulupale a anamukuttho, axilopwana anci-ene aalupale, othene oosuwelaxa a Isarayeli, miromolelo sothene, ni mateyooloku othene, Muluku aahimuvira vasulu khula mmosa a yaawo! Vano, iwo osuwela wa Muluku.

²⁶ Nwehe, Muulupalexa a Wirimu aakuvelaka waattittimiha ale oowiiyevihaxa ni oohisuwela etthu a vathi. Ole Muulupalexa a Wirimu aahikhuruwa wira aisuwelihe Mmansawe wa ale a vathixa elapo ya vathi, aaviraka vasulu othene wira aisuwelihe Mmansawe wa amakampuusi pure; aarwaaka waavaha amakampuusi pure ala Mutthaka muulupalexa wa okathi wothene. Yaahikhala anamitthaka anci-ene aalupale. Naamuwerya wuupuwela mahiku a Nowe, ni maprofeta, ni—ni anamukuttho aalupale, ni sikina, yaakhanle mahiku

avinre. Axilopwana aalupale oosuwela, mamwene, oowerya, ooruma, masi va Owo noorwa ni muulupalexa wa Mitthaka sothene. Mutthaka ene waari exeenii? “Mesiya ori muumu vano!” Munnona? Ni wira osuwelihe yeeyo, Owo aahaavira vasulu othene ooxuttihiwa, wira aasuwelihe amakampuusi oowiiyeviha.

²⁷ Nkuupuwelani yeeyo: anamukuttho othene, atthu othene a mukereja, awiixuttihi othene, wothene—mwixuttiho wothene wa teyoloxiia, musurukhu wothene waavareliwe muteko, ikereja sothene, ni miixuttiho, ni miromoleleo, sothene saahiviriwa vasulu! Wiixutta wothene awo yaavirihale aya wa othene—mamisiyonaariyu othene, ni otthara etiini wothene, omempuru wothene, ni itthu sothene awo yuupuwenle-aya wira yaahiira wira emuttittimihe Muluku, nnakhala Mutthaka ehulelo wa sothene iyo waahaavira vasulu. Yootikiniha! Mwaha wa xeeni? Munnona?

²⁸ Nto nwehe, kahi yeeyo paahi, masi nipuro nootepaxa ohuupuweleleya yookhumelela eyo. Amakampuusi, vano, ti yaawo yaakhenle Mutthaka. Nto vano nwehe nipuro Mutthaka waari-aya: nipuro nootepaxa ohuupuweleleya wira mutthu aamuwehererya orwa-vo. Ni kinniikoha, ohiy’ula, vaakhanle wira naawehererya Mutthaka w’ekeekhai wa Pwiya Yesu, kinniikoha sintoko waarowa okhala nnikhuru nohuupuweleleya, nipuro naari. . . wa olumwenku muulupale, wa elakeyelo yoosuwanyeya ni ekereja olelo enuupuwela okhala nikhuru na—na, oh, ookawanyeya? Kinniikoha sintoko vaavo khiwaarowa okhala nipuro naarowaahu omphwanya Yoowo? Nipuro nootepaxa ohuupuweleleya, ni alipa-oolavula ootepaxa ohisuwela. Amakampuusi khayasuwela hat’etthu yo olavula, wiitthana ipwittipwitthi paahi; vano, alakela mwaha wa yeeyo jaarwiiye-aya.

²⁹ Masi yaahikhala Masu yaalaiheriwe. Nwehe, vaamuweryaneya wira-tho yeeyo.

³⁰ Yaahaavira vasulu oosuwanyeya a mmuttettheni. Yaahaavira vasulu othene oosuwanyeya, ni khuupululeliwa ale oohikhala etthu. Oosuwanyeya othene yaari ootottopeliwa ni—ni ootori muulupale wa divindad ni—ni pisikoloxiia, ni—ni osoma woopwahaxa, ni ikatetrale suulupale ni itthu, sothene iyo saaviriwe vasulu khuupululeliwa ale oohikhala etthu. Osuwela, osuwela ohinimala wa Muluku Oowerya sothene waahiira, waasuveliha Mutthaka muulupalexa otonko okhala, “Mesiya vano ori elapo ya vathi.” Osuwela xeeni! Waaweryaneya paahi okhuma wa Muluku onsuwela osuwela! Osuwela wothene ni osoma wothene, ni sothene, vano saahiriheliwa ni oviriwa vasulu ni osuwela wuulupale wa Muluku. Kinkhala kitthikelaka eyo okhala wira kintthuna wira ekele vathi voowiixa. Sothene saahiriheliwa, khisaareerela etthu. Yaahivira vasulu yothene eyo

wira ethhuniherye osuwela wa Muluku okhalana ehaakhi, wira Muluku onnikuxa iye soohikhala etthu khukhaliha itthu.

³¹ Naamuwerya weemela vaava nilavule sa Yohani. Naamuwerya weemela nilavule sa Eliya. Khaavo onsuwela waakhumme awe Eliya. Yothene ensuweliwa, wira aarookhumelela vanlakani. Maprofeta moovirani m'okathi, awo khayaari etthu. Masi Muluku aakuxale eyo...ni khuvira vasulu i—ilakeyelo sa ekereja, ni miixuttiho, wira opake...ooniherye wira Owo Mulukuu. Owo onkuxa etthu ehikhanle etthu, wira iire etthu ni yeeyo. Owo onooniherya osuwela Wawe ni oMuluku Awe airaka siiso, aakuxaka oohikhala etthu. Okathi Owo ompanke-awe mutthu voopacerya, Owo aakunxe nikotto na oloko khumpaka mutthu ni nenlo. Vaavo yahaakhanlyaya etthu woohikhala oloko, masi Owo aahimpaka mutthu. Nto Muluku onikuxa soohikhala etthu vano, wira apake etthu ni seiyo. Ni nuupuwelakaru wira hiyo na etthu, vano khinikhanle orumeeliwaka mmatatani mwa Muluku. Nihaana ohiya sothene sitonko ahu osuwela wala wiixutta. [Munna Branham onikukuttha mmilo awe—Mol.] (Kileveliwe.) Ntoko Paulo Oowaarya muulupale, owo iirale wira aahaana oliyala sothene aatonko awe wiixutta, wira amusuwele Kristu.

³² Osoma waya wothene, ixuttiheryo saya sothene ni sikina, saamwaahonona. Vookiserya awo yaahimukhootta! Wiixutta wene yaakhenlyaya wa Yoowo, wira emwaamini, waahirukunuwa ni khukhala nwanani Awe oomuulumelaxa, ni khimukhomela!

³³ Moosuwela wira ehantisi iyo ennitthikela khula okathi khata? Eyo yookhumela yoosuweliwa. Yaamuweryaneya wiiraneya-tho vaava va ni hiyo. “Oh,” nyuwo muniira, “Kaakhanle-ru okathi yoole, . . .” Ahe, vano, mwaatthunaka osuwela etthu mwaarowaanyu wira wu, nwehe mukhalelo anyu wa vano; nto munoowerya woona etthu mwaarowaanyu wira wu, okhala wira vekeekhai eyo etthu eniisuweliha.

³⁴ Ooxuttihiwa waamini Masu Awe, vano nto okathi Masu Awe yaalipiheriwaaya ohoodo wa maitho aya, awo yaahikhootta Masu yaalipiheriwe. Okathi Muluku oonihenryawe etthu Owo aarowaawe wira, ni khuhimya etthu Owo aarowaawe wira, ni khooniherya etthu Owo aarowaawe wira, vano awo khurukunuwa khumwiitthana mulopwan'ola “erooho yootakhala” (yeeyo yaaruuhente otakhaliwa othene aya). Muupuwele etthu yiiraneie! Muupuwele etthu yaawiirihale-aya; wiixuttihiwa waya waahiwiiriha awo ohisuwela Masu ene oowiipaka erutthu a nihiku naya; wiixutta waya weiwo awo jaarinaaya muxikola mwaya, ni awiixuttihi ooreerelaxa.

³⁵ Nto nyuwo muniira, “Ahe, hiyo khinaarowa wira eyo olelo.” Awiixuttihi aya yaari oopwahaxa waavikana awihu olelo (aalupale, kiireke, wa awiixuttihi ahu), ni awo yaahivonya. Awo

khiyaarina mitthenkeso imiya thanu na xexe ni miloko mithanu na mixexe ni thanu na mosa soovirikana ntoko sirinaahu olelo. Awo yaarinasa miraru. Ni mwa miraru, saamalela mwa miraru, ni hata mmosa wa miraru khiwaasuwenle Eyo! Enrowa wooniherya paahi wira etthu mutthu eniiraawe onkhala ololo wa Muluku. Munnona?

³⁶ Vano, awo yaahivonya osuwela Eyo. Vano...Nto awo yaamwiira-tho etthu emosaru.

³⁷ Mutthu...Otthuna ti wooreera, kweekwe ti wooreera. Ni mutthu khonrukunxa mukhalelo awe, owo khonrukunxa vanci-ene inamuna sawe; kinimuhimya mutthu a molumwenkuni. Mutthu okathi wothene onimuttotopela Muluku, mutthu natiini, mwaha wa etthu Owo iiralyaawe, ni kweekwe athoonyaka etthu Owo onrowaawe wira, vano nto ahisuwelaka etthu Owo oniiraawe! Munnona? Owo ti mutthu paahi, owo opakiwe siiso, owo okathi wothene onkhala siiso. Ni nyuwo anammusoma Bibilia ohiy'ula munnisuwela wira eyo ti yoolikana ni Masu, "ekeekhai." Awo okathi wothene animuttotopela Muluku mwaha w'etthu Owo iiralyaawe, ahimiyaka etthu Owo onrowaawe wira, nave ahisuwelaka etthu Owo oniiraawe. Owo muhapo paahi wa mutthu.

³⁸ Etthu yiireny'aya yeela, awiixuttihi, mwa wuupuwela waka vano: awo yaarootaphulela Masu, okhala wira othene aya yaanimwaamini Mesiya aarowa orwa. Isarayeli othene aanaamini, awo nlelo annaamini olelo. Masi etthu yahaamusuweleny'aya *Owo*, Mutthaka Awe khuwaalikana ni otaphulela waya w'enamukuttho. Awo...otaphulela waya awo yaarinaaya wa Masu, Mesiya khaaisoonihenrye Mmansawe mwa enamuna awo yaataphulelaaya wira Owo aamwiira. Vano, nto tivo, awo khayaamusuwenle Owo okhala wira Eyo khiyaalikana ni otaphulela waya. Ntoko sihimaly'aka ottuli, ni kinoohimya-tho, "Muluku khommutthuna hata mutthu wira ataphulele Masu Awe. Owo ti mutaphuleli Awe Mwanene."

³⁹ Vano, Bibilia onihimya wira...Mukihiye kiwooniheryeni vano wira eyo Ekeekhai. Yesaya profeta, iyaakha imiya thanu na piili ni muloko ni thanu ela ehinatthi wiranayaa, Yesaya profeta aahihimya, "Mwali harus i onoorupala, ni onoomuyara mwaana." Khokhanle ohoverya wira atthu othene a okathi ole yuupuwela wira mwan'aya muthiyana aarowa okhala muthiyana yoowo, okhala wira Yesaya aahihimya. Masi, moone, saari iyaakha imiya thanu na piili ohoolo waya. Masi okathi...Muluku khaamutthuna hata mutthu wira ataphulele Masu Awe, okathi Owo aarowaawe wira, wala moota Owo aarowaawe wira. Owo aahimye wira aamwiira, ni Owo aahiira!

⁴⁰ Muluku oolaiherya wira Owo, mwa Yesaya, nave-tho, kookupali kapiitulu 28, ntoko versiikulu 18, nave-tho mwa Yoweli 2:28, wira mahiku ookiserya, iyaakha ikonto piili

sookiserya, Owo aamurowa omwaraxela Erooho Awe erutthu yothene. Owo iirale, “An’inyu alopwana n’athiyana anoolavula s’eprofeta. Amiravo anyu animoona soowoona. Anaxuulu anyu anooloha sooloha.” Ni itthu Owo aarowaawe wira, Yesaya iirale, “Miyo kinimwaalavulela atthu ala ni moolumo ookukuma ni ilavulelo sikina, nto nno ti Omumula.” Masi awo khayaarowa wiiwa Yaawo. Awo yaaroottikinya muru aya khuvira vasulu va Yeeyo. Owo iirale, “Meesa othene a Muluku yaamukhala oosareya marapheyo, ni khiyaarowa okhala etthu yooreera.” Nto eyo yaahikhale elatarato ya oYerusalemu, ni ekereja ya nihiku nle woorwaani wa Mesiya, yoolikana ni elatarato ya olelo emosaru. Eyo enoottthikela paahi.

⁴¹ Vano, okathi Muluku onihimy’awe wira Owo onimwiira etthu, Owo aahiira. Voohicala etthu mutthu mukina onuupuwelaawe wa yeeyo, etthu mutthu mukina enihimy’awe, okathi Muluku onlavulaawe etthu, Owo ohaana otaphulela Masu awo Mwaneene. Ni olipiherya Wawe wa Masu ti otaphulela Wawe Mwaneene. Nwehe, alipiheryaka Mutthaka wa Mesiya Awe. Owo aahihimya etthu Mesiya aarowaawe wira okathi Owo aarowaawe orwa. Nto okathi Owo orwiiyaawe. . .

⁴² Hata okathi asuweli onikhuma nsuwa yaawehalyaya okuusini, okhuma vaavo awo yaarisaya oPapilooniya, vano yaahoono ettheneeri yoottittimiheya. Mwaahisuwela wira khiyaavo yooyevaxa mwa wahala, hata nipuro, wira khula eweheryo (vaavo awo yaattharihaaya o—o—okathi ni ittheneeri, atthu aalupale yaasoma ittheneeri iya). . .Khiyaavo hata ehantisi enihimya wira ookhala wa awo oonale ettheneeri ile nnakhala. Mwaha wa xeeni? Khiyaavahiwe yaawo, awo khayaaphavela yeeyo. Masi asuweli ala yaanisuwela wira yaamukhala Ettheneeri ya Yakope yaarowa ovenya, ni awo yaaniphavela Yeeyo, ni Eyo yaahivira okathi Yesu oyariwaawe oPetelaheemu. . .

⁴³ Vano, koosuwela wira ilimalelo sahu s’eKristu, siri ntoko ikereja sahu, iyo sirina itthu voovirikana. Munookhumela nno nto muniwoona asuweli erwaaka omukokhorela mwaana; khiyaavo etthu ene eyo mwa Yolempwa. Miyaakha miili ohoolo waya awo yaahiphya iwe, aviraka mapuro oowaataleleya ni elapuwaka Muro Tikri. Awo khiyaarweenle omukokhorela mwanamwane, masi mwammiravo oophiyaka miyaakha miili. Yaari mwaha wa xeeni, okathi mmosaru, Heroti aawiiyalayawe anamwane othene okhuma iyaakha piili orowa vathi? Wira awerye onvara Mesiya. Moone, awo. . .Muluku aahilipiherya ni Masu Awe.

⁴⁴ Nto okathi asuweli ala aphiyalyaya oYerusalemu. . . Ettheneeri yaahaahoola mpakha nipuro nuulupale na etiini na molumwenkuni, Yerusalemu. Ni emalakarum ovolowa mikhora iye, ettheneeri ele (a erimu aahoolale) yaahikhootta owooniha-tho. Awo yaaheettasa mphironi axilopwana ala

ooreera murima, athaaciri ni ikhamelo soophampwa ikuwo sooreeraxa, ni sikina . . . nno ni nno mphironi yiiraka, “Ori vayi Ole oyariwe Mwene a aYuta. Hiyo nrimoona ettheneeri Awe onkhuma nsuwa.” Ni nipuro nlo nuulapale na etiini, miyaakha miili nuumala Mutthaka wa amakampuusi, nlelo khayaarina waakhula nnakhala khiyaasuwela hat’etthu ya Yoowo. Muru wa miromolelo sothene khuwaarina yo waakhula.

⁴⁵ Tivo eyo yaahikattyamiha Esineetriyu, ni awo yaahiwiitthana alipa a ikano wira arwe asome. Vano awo yaahimusoma wahala a Mikeya, profeta aahimye wira, “Nyuwo Peteleheemu, khamuhiyo nyuwo ooyevaxa a makhulupale othene a Yuta (ooyevaxa), masi mwa nyuwo onookhuma muhooledi onrowa waahoolela atthu Aka, Isarayeli.” Nto nuumala osommwa Soolempwa (ni nlelo silipiheriwaka ohoolo wa maitho aya), awo nlelo khayaakupali Yeeyo, enaamwi Yoolempwa yaahimye siiso. Miyo kinnihoverya vanci-ene wira awo anookupali olelo, Soolempwa silaiheriwe nihiku nla soonihieriwe-ru vale. Khino miyo pooti ohoolaleeryani-tho, masi kintthuna wira mwiiwe ela. Nlelo awo khayaaminni!

⁴⁶ Osuwela wuulupale wa Atithi onnikhaliha osuwela wa mutthu ololo saana mpakha Awo animuyevihaaya mutthu. Owo vekeekhai oniphiyera nipuro onimuyiirihaawe mutthu okhala oowuuliwa muru ni yoowo mwaneene, wira owo kahiyo muulupale voophiyerya wira akupali wira “oovonya.” Owo nlelo onikhala ni ehantisi awe, hata wira Atithi anlipiherya sayi wira Masu Aya t’eekeekhai ni wira Awo aniira etthu yaalaiheryaya wira. Mutthu onuupuwela wira osuwela wawe ti wuulupalex a ovikana wa Muluku, wira yaahirwe voolikana ni osuwela wawe, “Vano, Eyo kahi siiso.” Eyo ekeekhai mwa khula okathi, nlelo onthikela airaka. Munnoona moota yothene enlikanaaya oratteene, vano?

⁴⁷ Muupuxeryo xeeni wa amakampuusi ale! Malaikha yaakhurunwe olavula ni amakampuusi, Malaikha a Muluku arwaaka wira elavule nnikhuru na amakampuusi.

⁴⁸ Kinniikoha vakhala wira mootoko okhalana mureerelo wo—wo olavula ni makampuusi wala okhala ni mmosa, okathi vakhani? Mwaatonko ene, miyo—miyo khonkisivela ohimya eyo mwaha wa etthu kintthunaaka ohimya nuuvira okathi vakhani, masi makampuusi onkhala ni ipwittipwitthi vanci-ene mpakha owo hata ontheyaawe ntoko epwittipwitthi (anlaka), owo onlavula ntoko ipwittipwitthi, ni oninkha ntoko ipwittipwitthi. Ti yeeyo, okhala wira owo ori ni ipwittipwitthi. Ti yeeyo tu onsuwelaawe, ipwittipwitthi sawe.

⁴⁹ Vano, Masu oolipiheriwa a Ekeekhai. Okathi amakampuusi ala, atthu oowiiyeviha, oohisoma . . . Nttittimiho xeeni, moota enreerelaaya wa makampuusi waakhela muhupi wa epwittipwitthi enammala-ru oyariwa. Khiwaakhanle

omurweelaka hata mutthu mukina woohikhala makampuusi. Mwaha wa yeeyo Owo aayariwaawe munikhomani, nave kahi mpaani. Ipwittipwitthi khasiniyariwa mpaani, wala musaala ya oxipiritaali yoophwanelihiwa ni roosa. Munnona? Iyo siniyariwa munikhomani, ni mmapuwani.

⁵⁰ Mwaha wa yeeyo Owo *eettiheriwaawe* oKalvario. Khimukhanle weettihaka epwittipwitthi munvireloni orowa oniiviwa inama. Mwaahisuwela yeeyo? Oniiviwa inama, yookhalaniwa epuri enihoola ipwittipwitthi. Nto vaniphiyaaya nipuro vaniiviwaaya, eyo enootupha khukhuma khuhiya ipwittipwitthi sirowaka. Epwittipwitthi ehaana ohooleliwa, eyo khenwerya wiihoolela mmansaya. Vano, tivo, aahaana okhala makampuusi arweelaka...ipwittipwitthi sawe. Vamphwanyale-aya mwaana-Muluku nipuro nene nenlo namithaka aahimalyaawe wira Owo aamukhala, ni okathi awo aphwanye-aya Mutthak'ola wa namithaka mwaalyelya inama, vekeekhai vaavo Nlaikha naahimmyaya wira waamukhala.

⁵¹ Vano, koowiiwa atthu wira, "Nlaikha noolavula ni miyo, Nlo niirale, 'sa ni sa.'" Moota enitheihaya imaara sikina; ni kinniwiwaka atthu wira Nlaikha noolavula ni yaawo, ni khwaaaleela "sa ni sa" yeeyo yaari yoovirikana mara ni Masu. Vano, Nlaikha naakhanle wiiraka sayi yeeyo? Khivaakhanle okhalaka tu. Ni vakhala wira Muluku ohoolelani wira etthu *khata-khata* yaamwiiraneya (nyuwo *muniira* wira Owo ohoolelani yeeyo), nave kuhinairaneya, vano khaari Muluku aalavula ni nyuwo. Muupuwele paahi, ti yeeyo. Muluku khonootha. Owo khonkhala moowoothani.

⁵² Awo vaamphwanyale-aya Mwaana, ohakalala xeeni waakhanle wa awo. Okhala wira Nlaikha naavanhe mutthaka, awo yaamphwanye voolikana ntoko Nlaikha naahimmye aya wira aamukhala, ni nipuro nene nenlo Nlaikha naahimmyaya wira aamukhala. Etthu xeeni yaakhanle okhalaka wa yaawo!

⁵³ Mwaalyelya inama, mwaha wa xeeni? Munnoona moota amakampuusi ala yaakhalanse aya oowitthyaala munikhomani? Munuupuwela sayi wira aamwiira okhanle teyooloku mmo? Owo aamwiira amuhenle alufineti vaphulani vawe, iire, "Mukikumihе nipuro nla." Munnona? Owo aamwiira okhummе nipuro nlo, aamukhala mootakhaliwani.

⁵⁴ Masi, moone, yaari ntoko "okhala owaani" wa amakampuusi. Muluku onnisuwela nipuro n'oroiha-wo Mutthaka Awe. Munnona? Vekeekhai voolikana. Mwa mukhalelo ola amakampuusi yaaryaya-mo, munikhomani mwaya ni Mwaapwittipwitthi aya, Mutthaka woolipihеriwa awo yaaiwalyaya. Moota ereeralyaya! Ohoolo wa Mesiya, Masu oolipihеriwa a Mutthaka aya. Amakampuusi vaiwalyaya wira Mesiya aari elapo ya vathi ni khurwa Ohoolo Wawe, voopuroni vaya vene, ni khuphwanya wira Mutthaka waari ekeekhai,

waahilipiheriwa vale, moota yaawoonihalyaya axilopwana ale ophwanya wira Muluku aahiira etthu ila yuulupale mwaha wa yaawo!

⁵⁵ Vano, ale oosoma yaamwiira ehikhanle voopuroni vale, vathi va sookhumelela siiso, yaamwiira ekhumme naanaanoru. Mwaha wa xeeni? Namitthaka aarweelaka amakampuusi pure. Khino awo khayaawerya hata . . . ala . . . Akina wa amakampuusi ale khino khayaawerya hata olepa nsina naya, voohovereya saana. Nyuwo munnaasuwela amakampuusi Yesu aathanlale-awe okathi Owo aaryaawe muumu elapo ya vathi, wira asukeke ipwittipwitthi Sawe, “Nyuwo munnikiphenta, Petru, waavikana ala?”

⁵⁶ “Ayo, Pwiya, Nyuwo moosuwela wira kinnoophentani.”

⁵⁷ “Mukhapelele ipwittipwitthi Saka.” Ni Bibilia ohimye wira Petru aari mutthu oohisuwela etthu ni oohisoma. Nlelo aathanlaka amakampuusi.

⁵⁸ Mamempuru a mukereja mahiku ale avinre, anamukuttho, ni makhuru a atthu ooxuttihiwa saana nihiku nle yaamwiira akhumme voopuroni munikhomani. Vano, nkikupalanxe wira anci-ene a nyuwo mwaamuwerya wiiwa saana (khino, nyuwo atthu a mpooma) etthu yaanukha nikhoma na oYuteya, etthu naalikananaaya, ni inama munikhomani mmo, ni moota naakhanlyaya. Vano, amosa-amosa wa ala oosilimu a olelo yaamukhalaxa ota wa nipuro vale, awo—awo nnakhala khiyaarowa ovira vamukhora. Masi yaahimusivela Muluku, ni osuwela Wawe ohinimala, owuupululela ale yaarowa waakhela Yeeyo. Asomi, ni asuweli a nihiku nle vekeekhai khiyaarowa waakhela Eyo. Yaamwiisoona okhala ooyevihiwaxa ophwanyiwa nipuro ntoko nlo.

⁵⁹ Vano, voopacerya, awo yaatthikenle-ru okereja waya, ni khukhalela onamoona wira yaahikhala vamuthukumanoni ntoko yoowo, ni wira yaahiwaamini nikhuru na amakampuusi oohisoma oruha yookhumela ntoko eyo, awo yaamoomoliwa mukereja mwaya. Awo yaamoomoliwa munlokoni na oPeteleheemu, yaaphwanyiwe-ru ewiriyana nikhuru n’atthu n’ohisuwela etthu ntoko saaryaya amakampuusi. Ooyevihiwa, tthiri yaamoona okhala siiso. Awo yaaitakanxale-ru n’atthu pure siiso, ni okhala . . . akupaliki okawanyeya nno ntoko waamini wira Muluku aamuruuhela Mutthaka Awe nikhuru na amakampuusi oohisoma, okathi awo yaarinaaya sothene soolikana wa yeeyo. Awo waamwaapweteya oxirikha aya, yaahaana wunnya ipaphelo saya, ni yaamwiira ehiwenrye okhala oosuweliwa eriyari ya oxirikha wa makhuru aya a nihiku nle; okhala wira awo yaahitakanxa ni etthu ntoko eyo, nave woohikhala ni akhili ooreerela.

⁶⁰ “Muniloowa sayi nyuwo!” namukuttho aamuhimya. “Nyuwo ovolowa mpaani mwaka mowaarya mu ni okawanyeya iwo,

ni ololo ntoko owo, mutthu a mutakhwani oohisoma iwo ohi...ohironwe o...ohivinre exikola yoopacerya. Ni waamini mutthaka ntoko owo, wira, 'Nlaikha nimosa naahikhuruwa khulavula ni yaawo'?"

⁶¹ Masi ankhi mulopwan'owo aahimye wira, "Miyo kihoona Mutthaka awe olipiheriwa"?"

⁶² Owo aamwiira, "Mukihiye koovaheni ipaphelo sanyu kaakuvaka. Ni mukhume nloko nla!" Okathi onnirukunuwa, masi atthu nnari. Eyo khino yaamwiiraneya-tho olelo, awo yaamwiira yoomoliwe mukereja mwaya.

⁶³ Masi amakampuusi yaahiisoona wiiwthyaala voomalela nipuro nle ni Mwaapwittipwitthi a Muluku. Ni ti yoolikana ni khula makampuusi ooreera murima. Okathi makampuusi ooreera murima onkhapelela ipwittipwitthi onweryaawe woona Masu a Muluku owooniheriwa ni oolipiheriwa, wa etthu Owo aalaiheryawe wira, makampuusi owo ori ntoko owannyawe. Nkincala etthu mutthu mukina onihimyaawe, ele eri vale "Muluku oolaiherya Eyo, ni Muluku ohiira."

⁶⁴ Awo aniira, "Mahiku a miiriirya aavira. Khekanle etthu ene eyo ntoko Opatiiso wa Erooho. Khiyaavo etthu ene eyo ntoko Opatiiso wa Erooho Yoowaarya, eyo yaari ya arummwa."

⁶⁵ Masi mmuhiye makampuusi eekeekhai a Masu alaleerye Yaawo, mwa owerya wa ohihimuwa, wira Yesu Kristu mmosaru nsana, olelo, ni mahiku othene! Petru aahihimya nihiku na Pentekosite, "Natiri t'awinyu, ni awaya an'inyu, n'ale ari ottaiwene, othene ale Apwiya Muluku ahu antthunaaya owiitthana." Khula nipuro Awo aniwiitthanaya, natiri ni eparakha emosaru ekeekhaii. Ni mmuhiye makampuusi ooloka namalyiha Masu oone eyo olipiheriwa, mateyooloku othene molumwenkuni khanwerya okumiha eyo mwa yoowo; okhala wira owo onnisuwela wira Muluku ohimye siiso, vano enniiraneya. Ti yeeyo tu. Awo Masu a Muluku paahi okathi wothene. Masu Awe yaahiipaka erutthu ni yaakhala ni yaawo, nave awo khiyaasuwenle.

⁶⁶ Owo oolaiherya etthu emosaru nihiku nla. Kinniikoha sintoko hiyo naamusuwela Yeeyo? Oowiisoona ni asuweli khanaakheleke etthu ntoko eyo. Ni awo yaamini wira vakhala wira yaahikhala etthu iyo ntoko Mesiya elapo ya vathi, vekeekhai aahaana orwa mmuromoleloni mwaya. Naarowa okhala nikhuru naya naarowa waakhela Eyo, wala "Khiyaari yoolikana." Vano, muupuwele paahi oratteenexa. Yaahikhale munikhuruni mwaya, weeso...Mooweha, nto? Muluku khaamuthanlale hata mmosa a nikhuru naya, masi Owo aamuthanlale ole ahaaluttanne ni hata mmosa aya. Okhala wira nikhuru nimosa naamwiira, "Munnoona etthu niiraly'ahu?" Ni awo yaamwiira yeeyo olelo. Masi Muluku onimuthanla oohikhala etthu, mwaha wa yeeyo Owo aamuthanlale-awe

makampuusi. Amakampuusi yaari owannyeya voomalela ni Muluku-mwaapwittipwitthi eriyari aya, Masu Awe oowiipaka erutthu eriyari aya. Ale oowiisoona ni oosuwela khayaakhenle Eyo, yaahaavira.

67 Ni hiyo naamuwerya ohimya etthu emosaru ya olelo, wala wa khula okathi. Yaari itthu imosaru mahiku a Martinho Lutero. Etthu emosaru mahiku a John Wesley. Yaari itthu imosaru mahiku a aPentekosite. Masi Muluku khoneemexiwa ni hata mutthenkeso wa mutthu! Owo onootthikela eettihaka Erooho Awe wira alipiherye Masu Awe! Yaahaana wira ekhanle-ene ni orwa mwa enamuna muthukumano aya ahiiso awo khayaarowa waakhela Eyo. Awo t'othipelelaxa olelo, ikereja sothene, mpakha "anrowaaya wira *elexe n'ilexe*, ni otakaniha ikereja sothene vamosa." Kaahiki khanimphavela namitthaka olelo, onwerya owiiraanihya aPrustante othene, aKatolika ni Ortotoksa, itthu sothene vamosa, ni opaka ekereja emosa yuulupale.

68 Vano, axinna, miyo kinnikhalanaka oreeriwa wo olaleerya itiini imiya sene soovirikana, ni aakhala athu oreera murima mwa sothene iyo. Masi vano, muupuwele, miyo kinlaleerya y'eprofeta, "Khula mutthenkeso ohaana okupali ila, ahiiso ohikhala mutthenkeso. Eyo enimookhanyereryani." Moosoma epaphelo ya ihapari ya oTucson olelo weiwo anamukuttho aKatolika yaakhalihenryaya okhala murumeyi, mpapheloni...yaakhalihenryaya omukhaliha murumeyi, oMissouri, namukuttho Prustante? Nto taani yeemerernye? aPrespiteriyaano, aPatista, aLuteraano, ni Asempeleya a Muluku. Eyo eri vapapheloni va ihapari ya oTucson y'olelo.

69 Oh, ti yootutuxa! Kahi axilopwana muhina mmwe, ti akhulupale ale a kuveerunu, a onamukuttho anvirikanyiha etthu mpaani mmwe, eyeettiheryo enoorihelelani mwemmo hata mutthunaka wala nnari. Nyuwo khimukhanle otthikela mukhalaka mutthenkeso ni otthyawa oviruwa nno onrweela elapo ya vathi, nto moone eyo yahaakhanle ekeekhai. Khino kinimwiira kironwe-ene yaairaneyaka, mutthikele orowela mwa emosa wa ifiita iya. Vano nto yahaakhanle siiso, miyo ka namoona oowootha. Yaari yeeyo, kihimnye Ekeekhai.

70 Awo yaamwiihana Eyo "Muthinto mmosa wa erooho yootakhala" yovirikanya enamuna aya yo wuupuwela vooloka. Enniwiwa vanci-ene olelo sa wuupuwela vooloka: muhelele muupuwelo anyu paahi mwa khula etthu, ni muupuwele vooloka yeeyo. Xetwani onniwerya wira yeeyo! Eri etthu emosa paahi enruma vasulu wa sothene, nto awo Masu a Muluku. Nyuwo muupuwelakaru vovirikana ni Masu, muliyale muupuwelo anyu. Muupuwele Masu.

71 "Mesiya," awo yuupuwela wira, "khaarowa ophwanyaneya nipuro ntoko nlo, etthu yoottakatta siiso."

72 Mwaamuwerya otthokelela, mukhulupale a anamukuttho oorerela muulupale, wala mulipa-ooholela etiini, othene ooratta mwa teyoloxiia, aamurowa orwa munikhomani moosareya mavi a inama? Ni okupali Mutthaka wa makampuusi oohaawa, oowiiyeviha ahaasomme, ni orwa wira “Moone, kinoowerya owooniheryani, ola ti Mwaana, ola ti Namitthaka?”

73 Nto nyuwo moosuwela etthu atthu ale yaarowaaya ohimya? “Mulopwan’owo t’a nneema, owo t’exariya saana mwa ele Owo onihimyaawe, masi owo oovonya mara!”

74 Kinniwoonaka atthu okhala makhalelo ooreera mpakha atthu yahaarowaaya waamini, kahaakhanlyaka ohimyaka etthu mwaha wa yaawo, masi awo aniira “Owo oovonya mwa exariya. Owo khonsuwela etthu enihimyaawe. Muluku, Owo khaarowa wira etthu ntoko eyo.”

75 Masi va awo yaahikhalana eyooniheryo! Nto n’ukhala eyooniheryo, “Murowe onikhomani iwe moone vakhala wira Mwaan’owo khaataleliwe weiwe.”

76 Awo yaamwiira, “Nyuwo muroloiwa ni erooho yootakhala, enoohimihani yeeyo.” Nnakhala vo eyo yaari voolikana ni Masu a Muluku! Ni awo yaari oohoona wira yoone Eyo, okhala wira teyoloxiia aya aahaakhaliha oohoona. Maxakha xeeni!

77 “Ophwanyiwa nipuro ntoko nlo? Voottakatta ntoko nla naaryaya? Munikhomani?” Okathi awo yaarinaaya nipuro nooreera wira Owo arwe, awo yaahikhalana sothene soolikana wira Owo arwe, vano nto wuupuwela wira Owo aamurowa orwa (ni orowa) ni khaarowa waaruuwela Mutthaka awiixuttihi aya. “Ni wira waanvahiwa nikhuru na amakampuusi oohisuwela etthu? Vano nto omuruuha Mwana Awe, ni omuhiya Owo oyariwa mu—munikhomani? Nikhoma pure n’orentteri? Ahe, mwa—mwaalyelya inama mwa malaxi? Vano, khivaaweryaneya okhala siiso!” Awo khiyaarowa waamini Iyo, okhala wira yaari yowwiiyevihaxa.

78 Ni Eyo ti yookhweyaxa, ti siiso kweekwe enaaviraaya vasulu asuweli. Ti yookhweyaxa, Eyo ennaatepanya. Awo animwaavya Muluku ottaiwene iwe, nave Owo oryeene va. Munnona? Awo anaavya etthu ottaiwene wu, eryeene vaava ni yaawo naanaano va: Kristu, oohihimuwa mw’alipa-ookhwa, mmosaru nsana, olelo, ni mahiku othene.

79 Itthu saya sothene suulupale saahiviriwa vasulu. Masi tthiri yaari Ekeekhaii, wira “aahikhala Mesiya.” Hiyo noosuwela olelo. Hiyo ninnaamini olelo. Hiyo ninnikupali iyo olelo.

80 Masi nto vakhala wira Muluku oolaiherya etthu ya Natale ola, aahilaiherya etthu nihiku nla, ni ennooniherya wira ti siiso, ni nnakhala vo hiyo ninrerya ettuli Yeeyo, vekeekhai niri muxovo mmosaru awo yaaryaya nihiku nle yaavinre vasulu; okhala wira Eyo khen—khenrwa mwa esivelo ahu ya muromolelo. Tivo hiyo nry’ahu mw’evitikavitika ela Natale ola.

⁸¹ Yesu Kristu khokhwiye, Owo mukumii. Owo ori vaava olelo! Bibilia ohimye wira, “Owo mmosaru nsana, olelo, ni mahiku othene.” Owo oohimya, mwa Yohani Oowaarya 14:12, “Ole onikaamini Miyo . . .” (kahi ole oniipaka waamini, ole *onihimya* wira onnaamini) “Ole onikaamini Miyo, miteko sinvaraaka nave-tho owo onoovara. Ni soovikana iya owo onoovara, okhala wira Miyo kinrowa w’Atithi.” Ni miyo koomoona Owo, mwa makhalelo aka, sinci-ene sa miteko imosaru (Owo ovanre-awe okathi ule) ovikana iye silempwe mmakukhuni mwa Bibilia ola. Ni ennivira vamuru w’ale oosuwela olelo, ni anuupululeliwa anamwane antthuna wiixutta; ntoko Yesu sivekenlyawe. Eyo ekeekhaii, Owo ohiira ovikana Owo. . . Miyo kihoona nihiku naka, mwa miyaakha saka miloko miraru ni miraru sa orumeyi, miyo koomoona Owo airaka-tho ovikana sisomalyaka sa Yoowo siiralyawe mBibiliani; soowattaxa sa etthu emosaru.

⁸² Masi voohiya ele Owo iiralyawe okathi ule, munuupuwela wira eSineetriyu yaahimwaamini Owo? “Ahe,” awo yiirale, “nyuwo murooloiwa.” Masi, ninniphwanya, wira nipuro awo yaavonyalyaya waari osuwela. . . mwa osuwela, kahi etthu eyaaminelo aya yaahimy’aya, masi ele Masu yaahimye aya wira Mesiya aamwiira nihiku naya. Ni ti vaavo hiyo ninvonyaahu olelo, ohaavyaavyaka Soolempwa. Yesu aahaleela, “Mwaavyavye Soolempwa, mwa Seiyo munnuupuwela wira mookhalana Ekumi Ehinimala, ni ti Seiyo sinkikhalela Miyo onamoona. Iyo sinimooleelani Miyo k’ani.”

⁸³ Nwehe, Muluku aahisuwela khalayi-ene wira awo yaamwiira yeela, owo ti *mwaha* ene Owo aarinaawe waaroihela amakampuusi. Owo aahisuwela wira khiyaarowa wira, awo khiyaarowa waakhela Eyo. Vano nyuwo munnoona mwaha wa xeeni yaarinaaya okhala amakampuusi? Mwaha wa xeeni amakampuusi? Mateyooloku khayaarowa waakhela Eyo. Mwaha wa xeeni amakampuusi tho? Yaamurowa orwa voovirikana ni Masu Awe? Nnari! Awo yaari amakampuusi, yaanisuwela ipwittipwitthi; ni Owo aayariwe siiso, epwittipwitthi, mwaapwittipwitthi. Nwehe, Owo aari Mwaapwittipwitthi. Awo yaari—awo yaari nikhuru nimosa paahi yaarowa omukupali Owo. Makampuusi t’itthu emosa paahi yaarowa omukupali Mwaapwittipwitthi. Awo yaanisuwela moota w’omukhapelela Owo, ni ti siiso olelo naakhelaka Mutthaka wa Mwaapwittipwitthi.

⁸⁴ Vano yootutuxa! Atthu oowiiyevihaxa, oohisuwelaxa etthu emukokhorelaka Emanuweli munikhomani. Anciene. . . Ni yaahikhala atthu iwe, mahiku mamosaru yaawo, yaamwiixuttiha teyoloxiia aya. Mittithi suulupale, sikhumaka mapuro othene, okhuma mapuro othene a mulaponi, yaanirwa ovaha mukuttho Yehova aahimmyawe wira waari “woowunkhela mmphulani Mwawe.” Ni va yaari amakampuusi oowiiyeviha, munikhomani, emukokhorelaka

Emanuweli; Muluku Mwaneene oowiipaka erutthu, aataleliwe munikhomani. Moone, moota hiyo ni wiixutta wahu wuulupale, ni muru ahu wowiinuwa ntoko wira ninsuwela etthu, nto Muluku onviriha etthu yothene vasulu. Munnona? Owo oniira ele Owo onlaiheryaawe wira, ni Owo okathi wothene onniira yeeyo. Masi nwuupuwele amakampuusi ala oowiiyeviha iwe emukokhorela Eman-... Emanuweli munikhomani. Ti yootutuxaxa. Tthiri ti yeeyo!

⁸⁵ Vano ota... Vaamanlyaaya omukokhorela Owo, ni khusuwela wira Mutthaka yaakhanlyaya alaleeryaka waahilipiheriwa, awo ari... yaari ota vale amuttotopelaka Muluku ni Mutthaka wootepa ohikupaleya wa Nlaikha. Vano mulikanyihe yeeyo ni olelo. Mweemele minuutu mmosa paahi muupuwele. Axilopwana ota vale amukokhorelaka Muluku, ni amuttotopelaka Yoowo mwaha w'etthu awo yoonalyaaya, etthu yiiwalyaaya, etthu yaasuweleaya wira yaari Ekeekhai, ni Mutthaka waari woohikupaleya wa muupuwelo wa akhili. Waari woovirikana ni muupuwelo wothene w'enamukuttho, nnakhala vo waari Ekeekhai! Eyo Ekeekhai! Awo yaahaamini Yoowo. Nto vano, moota okhanlyaya okhalaka ololo osuwela wa mutthu! Nto yiraka nikhuru na Malaikha naahiwiipela noweeli oopacerya. Mwaamuwerya otthokelela yeeyo? Wa makampuusi ahaawerya olepa nsina nawe, ankhaka ntoko nikhoma na ipwittipwitthi, eettaka mphironi, akhuwelaka, "Auwiihiwe Muluku Wirimu-rimu! Hiyo noosuwela wira Owo ori elapo ya vathi!"

⁸⁶ Namukuttho khwira, "Mulopwan'ole oovahuwa. Nwehawehe muliivuruni moone aakhanle-ene mempuru a muthukumano ahu. Owo vekeekhai onninuuliihiha muru mwaha wa miixuttiho sawe soohilakeya. Mmukumihe wa hiyo. Khaninrowa wuuliwa muru eriyari y'atthu."

⁸⁷ Ahe, nyuwo pooti wuuliwa muru eriyari y'atthu ni ovuwihiwa vamaithoni va Muluku; wala muthanle, okhala wira, muupuwele, esivelo ya onamukuttho wa nihiku khenlikana ni Masu a Muluku. Khasikhanle isivelo imiya thanu na xexe ni miloko mithanu na mosa ni thanu na xexe soovirikana. Esivelo emosa, Masu mamosa, Muluku mmosa. Ti yeeyo tu.

⁸⁸ Ehimyaka wira Malaikha aawiipela noweli oopacerya, nave-tho ahimyaka wira awo "ahaakhela Mutthaka wa Nlaikha." Nlaikha naahaakhumelela, khwaavaha Mutthaka, vano awo khurowa khuphwanya wira Mutthak'ole waari Ekeekhai. Ni yiraka, "Ohiya vo, Nlaikha nooniiipela noweeli oopacerya."

⁸⁹ "Mwaamuwerya otthokelela?" Awo yiirale, "Mulopwan'ole oohaawa." Awo khayaatonko okhalana etthu siiso yiiraneeye eriyari aya, moosuwela, tivo waari mwiiixuttiho wootikiniha w'awo. Ni mwaha wa yeeyo awo yahaawery'aya ophwanya Eyo mwa Soolempwa, khiyaari wira awo aphwanye Eyo.

Woohikupaleya wa asuweli, musuwelelo owo khiwaatonko waakhumelela. Woohikupaleya, nnakhala vo waari Ekeekhahi. Eyo Ekeekhahi, hiyo noosuwela wira Eyo Ekeekhahi. Muupuwele! Oorukunuxa murima oopacerya a Kristu ni muthukumano woopacerya yaari amakampuusi, kahi anamukuttho; amakampuusi, anamasukiha. Mwaha wa xeeni amakampuusi?

⁹⁰ Nwehe! Ota iwe amuttottopelaka ni anvuwihaka Muluku mwaha w'etthu awo yoonaly'aya ni yiiwalyaya, yaawiiwale Malaikha emaara yoopacerya omwiipela mutthu. Malaikha yiira ehinatoko omwiipela mutthu khalayi. Ni nkawehani makhuru a alipa-oowiipa ale, moota yiiraaya yeemenle-ene ni wiixuttihawa ni oreherya masu ale, "awo yaarowa wiipa wooyariwani wa Mesiya," nto othene yaaviriwe vasulu! Ni Malaikha yaahikhuruwa khuwiipela amakampuusi a ipwittipwitthi pure, kahi ni ikuwo s'enamukuttho, masi awaranse-ene ikuwo sa amakampuusi. Ni nkawehani taani yaakhenle Mutthaka woopacerya, ti yoohikupaleya.

⁹¹ Ni nipuro waavahiwaaya, kahi mukatetrade, masi mothakoni, mothakoni memmo Nlaikha n'Apwiya naarwiiye-aya. Kahi mukereja, mothakoni. Owo hata khaakheliwe mukereja. Awo yona wira Owo aahaakheliwa, ni yona wira yaahikhalana Yoowo, masi Muluku aahooniherya wira yaari yoovonyeya. "Owo onniwerya ni maluku ala waavenxa aana a Abrahamu." Ti yeeyo.

⁹² Emaara yoopacerya Malaikha yaatonko aya wiipa voothapelani, waari Wirimu. Mwaweha-ru mwa Yobi 38:7, (ntoko siniwoonaaka amosa-amosa a nyuwo alepaka), waari okathi Muluku uupuwenle-awe opaka yoopattuxa Awe yoopacerya, elapo. Yobi aari mutthu mulupale, oosuwela, ni aahikhalana inamuna sothene sa akhili. Owo iirale, "Kaarowaka mmapasarinini, akhulupale amiravo, othene aya annuurama ohoolo waka, ni antthuna paahi okathi wa osuwela waka." Ni khaawerya osuwela mwaha wa xeeni aarinaawe ocaliwaka enamuna saacaliwaawe.

⁹³ Nto siiso Muluku khunvekela owo, khwira, "Mweemele mwiilipihe ntoko mulopwana, okhala wira kinookhuruwa kilavule ni nyuwo." Nto okathi Muluku okhurunwaawe muyuupuruni, Owo iirale, "Yobi, mwaari vayi nyuwo Miyo kihinatthi opattuxa elapo? Okathi ittheneri s'oxaka siipaaya vamosa, ni aana a Muluku yaatthapaya mwaha w'otteeliwa murima, nyuwo mwaari vayi okathi yoowo, Yobi?" Nto owo aahikhulumuwa okathi ene yoowo. "Mwaari vayi?"

⁹⁴ Moone, emaara yoopacerya Malaikha yaatonko aya wiipa mwaha w'otthapela, waari Wirimu. Masi emaara yoopacerya awo atonko aya wiipa mulaponi, yaari wa amakampuusi wooyariwani wa Muluku, Emanuweli elapo ya vathi; athhu

oopacerya atonko wiiwa Nlaikha wiipa, yaari amakampuusi oowiiyeviha.

⁹⁵ Naawoonaka axithiyana ahu oowiipintari wiitho, maihi oomethiwa, yaawaraka akaputtula, ni waawariha muthinto mmosa wa nlaya na mukereja, ni waaviriha ohoolo wira yiipe ntoko etthu, vano nto hiyo ninuupuwela wira Muluku ohaana wiiwa yeeyo? Owo ookhalana Malaikha wu akhanle omutthekulihaka Owo okhuma e. . . Owo ohinatthi hata ompaka mutthu. Uh-huh. Anookhuma ni okhala, n'uwara ikuwo siri soonanara wa Muluku, nto munwerya sayi owehererya yeeyo okhala ya Muluku? Nyuwo muniira, "Ahe, kiniira mpantta wa. . ."

⁹⁶ "Mwaari vayi okathi Miyo kaapattuxaaka elapo? Mukileele vahlenyaaka-vo mavatta aya. Eri vayi eweexo iyo sinrunkuwaaya? Nyuwo mwaari vayi okathi owo?" Nyuwo munuupuwela wira Muluku ohaana onivekela hiyo osuwela wahu vakhani. Osuwela wahu ololo paahi wa Yoowo. Owo oniira etthu Owo onihimy'awe wira onimwiira.

⁹⁷ Vano nwehe, Muluku onihalela opaka soopattuxiwa sikina. Owo apattuxaka elapo enookhwa, ekumi enookhwa. Malaikha aniipa Wirimu. Masi va Owo ompattuxa Ekumi esya, Ekumi Ehinimala wa mutthu, ni Owo oniwiipela atthu Awe mwa Malaikha; elapo ya vathi, kahi Wirimu. Erimu yaahikhalana Ekumi Ehinimala. Munnona? Ni Owo iipale. . . awo yaahiipela Wirimu, okathi opacernyaaya opattuxiwa sinookhwa; nto va epattuxelo ya soohikhwa enookela, nto vano awo aniwiipela atthu a elapo ya vathi. Emaara yoopacerya, wa amakampuusi. Yootutuxa, kahi siiso?

⁹⁸ Owo aahipacerya yoopattuxiwa esya. Yaari exeeni iyo? Opattuxa wa Yoowo mwaneene. Muluku aahiipaka erutthu khukhala ni hiyo. Eyo ti. . . Bibilia iirale, "Wopaceryani wa opattuxa wa Muluku." Muluku aapattuxiwe mwa mukhalelo wa mutthu; Muluku aakhala, mwa Yesu Kristu, Mwan'Awe. Owo aatenke empa Awe ya erutthu ni makhuva, ni aakhala mpaani mwemmo; Muluku, *Emanuweli*, "Muluku ni hiyo." Owo aaitenke Mmansawe empa, wira akhaleke mwemmo, wira aweryeke owooniherya Masu Awe atthu Awe mwa yeeyo. Moosuwela etthu Muluku okhanly'awe, mwaamoonaka Kristu.

⁹⁹ Muupuwele, kweekwe onnikhala wiipa wooyariwani wa mwene. Akavi yaasuwela yeeyo? Vekeekhai, mwaahisuwela. Ahe, vano, nyuwo munuupuwela wira vaakhanle wira Mwene ola aamuyariwa iwe, muthiyana aamoowa atthimakaka okela mukatetrale nipuro nlo, ahimye wira, "Mutthokihe olili mwaakuveke, ni muwiitthane matothoro, okhala wira kinrowa omuyara Emanuweli mulaponi"? Muthiyana mmosa namuhaawi a oNasareti, epooma ya vathixa, mu. . . yootakhala ovikana oTucson wala sikina saya, nave nnakhala

vo mwamuthiyana ola aarwiye-ru iwe wa mukhulupale a anamukuttho khwira, “Miyo—miyo kihanle omuyara Emanuweli.” Awo yaammurihela mukhatteya. Vekeekhai yaammurihela. Vekeekhai yaammurihela. Mwaha wo oruha okawanyeya ntoko iwo eriyari ya athu aya, owo khaarowa ovilela. Nnakhala olelo khaarowa wira. Masi enamuna emosaru yeeyo enimwiiraneya, mwa inamuna sothene.

¹⁰⁰ Nwehe, ahaana okhala masipo. Mamwene yaari. . .Owo khaarowa wiipeliwa. Athu khayaarowa omwiipela Owo, okhala wira awo khayaamwaamini. Nto mwaha wa yeeyo, ela enoorwa va, vanreerela nvare, mwaha wa yeeyo olelo athu anuuleliwaaya muru omuttotopela Muluku, awo annuuleliwa muru Kristu! Ikatetrale suulupale khasinrowa waakhela Opatiiso wa Erooho Yoowaarya, awo arimwiikhalihaxa mwa inamuna saya sa enamukuttho mpakha ahinrowaaya waakhela. Muluku onoorowa omphwanya mutthu wa yoowo Owo okhanlyawe ophwanyaka nttotopelo. “Owo onniwerya ni maluku waavenxa aana a Abrahamu,” kimuhimyaka-tho Yohani.

¹⁰¹ Nwehe, athu Awe ahaana omwiipela Yoowo. Nto athu Awe iwe yaari Malaikha Awe, nto yaawiipenle amakampuusi Awe yaarowa okuxa Mutthaka Awe.

¹⁰² Taani yaarina wiiwa Yoowo voopacerya? Vekeekhai, Athu Awe. Ti yaawo yaarowa omwiiwa Mwene oniipaka voopacerya, yaarowa okhala athu Awe. Nto athu Awe yaari exeeni? Ethu yootutuxa, kahi siiso, axinna? Khayaari anamukuttho Awe. Khayaari mateyooloku. Ti yeeyo. Khayaari athu a muromolelo. Nnari, yaari amakampuusi. Mwaha wa xeeni? Yaahikhala epwittipwitthi yaayariwe, mwaha wa yeeyo. Munnona? Athu Awe yaahiiwa Yeeyo, yaawo Muluku aasuwenle-awe wira yaamwaamini. Muluku aaveleelihenrye Mutthaka Awe ale yaarowa waamini Yoowo. Owo ti osuwela wothene; Owo onnisuwela nipuro n’oveleeliha-wo Mutthaka Awe, ale anrowa waamini Yoowo. Ole Muulupalex a Wirimu ooveleeliheriwa ale a vathixa wa athu a mulaponi.

¹⁰³ Yesu oohimya, mwa Matewu 5, “Ooreeriwa t’ale ari amasikhini muroohoni, okhala wira ti wawaya Omwene wa Wirimu.” Maria, mwa. . .Mwaalepaka vale Soolempwa iyo, owo ti Matewu 5. Ni nyuwo mwaalepaka Soolempwa. . .Ti yeeyo kirinaaka yoolempwa va, ti Soolempwa.

¹⁰⁴ Maria oohimya, mwa Luka 1:52, okathi aattikittheliwaawe ni Erooho, Erooho Yoowaarya mwa yoowo, Owo iirale, “Owo oowunnuwiha ale oowiiyeviha.” Maria oohimya eyo, maama awe Yesu, khwira “Owo owunnuwiha ale oowiiyeviha.”

¹⁰⁵ Luka oohimya-tho wira, “Athu pure yaanimwiiwa Owo n’utteeliwa murima.” Kahi o—oothanliwa, ma—mateyooloku, matothoro a malamulo ni a divindad; masi athu ene pure yaanimwiiwa Owo n’utteeliwa murima, athu oowiiyeviha.

106 Mwa Soolempwa sothene sooreerihiwa, Mutthaka wo ovuluxa ovahiwe ni amakampuusi nave ni ipwittipwitthi.

107 Vano kihaana omaliha, okhala wira nimphiya okathi wo omaliha. Kinoovira vasulu Soolempwa sinci-ene wira paahi kiwerye wooruuhelani muupuwelo ola.

108 Mwa Soolempwa sothene, ovuluxiwa wooniheriwe mwa amakampuusi ni ipwittipwitthi. Ti yeeyo. Hiyo othene ninniiraana mwa yeeyo. Mwaha wa xeeni? Yaari mw'erukuni ni ethoonyeryo. Ni etthu p'itthu...Kahaatonko wona ntata naka, nto kiweha vathi va eruku ya ntata naka, ni kinoona wira kaarina ikatha thanu, kaamusuwela wira yaamooniherya; nekatiivu yooniherya positiivu. Ni mwaha wa yeeyo Mutthaka kweekwe waarwenle...ovuluxiwa mwaha wa pwittipwitthi, okhala wira okhuma woopaceryani wene...Ni waari ovira mwa ipwittipwitthi, wa amakampuusi, Owo iisuupulunly'awe Mmansawe. Sothene saari iruku ni ithoonyeryo.

109 Vano nrowe niwehe woopaceryani. Atamu ni Hawa, eemenle-ene vale ohoolo wa Muluku wira yiiwe Mutthaka Awe wa yaawo, awo yaawarinhe iyuunu saya esapala ya ipwittipwitthi. Mutthaka woopacerya waatonko wiiwiwa, waavahiwe vasulu va esapala ya epwittipwitthi, Muluku aamwiivalyawe khumputaputela Atamu ni Hawa mwa yeeyo. Vaamanlyaya weererya opaka etiini aya yaawo ya makukhu a efiiku, khuhivara muteko. Mukuttho wa epwittipwitthi waahipacerihiwa ottipihiriwa itampi okhuma woopaceryani wene, mukuttho wa epwittipwitthi.

110 Vano, ninrowa omaliha ela vano, ni owooniheryani mwaha wa xeeni awo akelaka okhala amakampuusi; ni mwaha wa xeeni ekelaka okhala, Owo akelaka okhala epwittipwitthi.

111 Vano, maprofeta a Waataana wa Khalayi yaawara isapala sa ipwittipwitthi (hiyo noosuwela eyo, uh-huh), ehimyaka waamini waya mwa Masu Awe a Mwaapwittipwitthi ooloka voomalela aarowa orwa. Mwaha wa yeeyo maprofeta.

112 Vano, Masu a Muluku kxanimurweela teyooloku, khiyaavo...owo—owo t'ontepanya Yaawo. Ti yeeyo. Khiyaavo etthu ene eyo ntoko ohimmwa wira yootoko...Nyuwo muniira, "Ahe, mulopwan'ola teyooloku." Eyo ennimukhalaha ottaiwene wa Masu ovikana etthu p'itthu ensuwelaaka. Munnona? Masu a Apwiya Muluku, Muluku ohinrukunuwa, ohinkhalakhala orukunuwaka. Khula nipuro mBibiliani, Masu a Muluku okathi wothene jaarwenle maprofeta. Kahi mateyooloku wala matothoro, wa maprofeta! Ni awo kweekwe, khula okathi, yaahikhoottiwa ni ohitthuniwa.

113 Maprofeta voolimaleleya yaari amakampuusi nave. Maprofeta yaawaraka isapala sa epwittipwitthi, okhala wira awo yaawara esapala ya epwittipwitthi awo yaasukihaaya. Ni mutthaka woopacerya, wa n—n—nloko n'atthu noolamuliwa,

waari vasulu va isapala sa epwittipwitthi. Maprofeta, kinoochimya-tho, yaawara isapala sa ipwittipwitthi yivitikelenle, okhala wira awo yaakhalela onamoona ni yeeyo, wira yaahaamini wira aahikhala Mwaapwittipwitthi ooloka aarweela mukuttho yoowo. Nto Masu a Muluku jaarweela yaawo vasulu va isapala sa ipwittipwitthi. Amakampuusi ala. . . ahiiso maprofeta ala voolimaleleya yaari amakampuusi. Abrahamu aari makampuusi. Isakhi aari makampuusi. Yakope aari makampuusi. Moise aari makampuusi. Davidi aari makampuusi. Anammuthoonyerya Muluku voolimaleleya yaari amakampuusi.

¹¹⁴ Vano ninrowa osuwela mwaha wa xeeni jaarweenlyaya amakampuusi. Awo yaanisuwela wira ipwittipwitthi ti soohikhalana mukhaliheryo saahikhalane makampuusi wira ahooleleke. Awo. . . epwittipwitthi ti yoohikhalana mukhaliheryo voomalela, eyo khenwerya wiiseettiha. Mwaha wa yeeyo Muluku aalikaninhe-awe an'Awe anaamini ni ipwittipwitthi. Awo ahaana ohooleliwa. Masi nwehe ele enooholelani! Muhiphwanye epuri, eyo enimooroihani oniiviwa inama. Muluku khonanivaheke epuri, Owo onivanhe Mwan'Awe (Erooho Yoowaarya) wira enihooleleke. Owo ti Muhooleli ahu, kahi makampuusi oopakiwa ni mutthu, masi makampuusi oovahiwa ni Muluku yoowo onlyiha ipwittipwitthi ni yoolya ya ipwittipwitthi.

¹¹⁵ Vano, nyuwo mukuxe ekuluwe, nto mwiirele ekuluwe ela, "Kinrowa wookhalihani mwaapwittipwitthi." Ni murapihe. Ni mupintari makwarikhwa a munawoni, ni—ni siiso. Ni nvahe yoolya ntoko epwittipwitthi, nvahe muthinto mmosa wa e—elyelo. Nto muhele ota vathi wala ota. . . nipuro i—ipwittipwitthi sinlyaya, mmatta mwa alfaafa wala etthu. Ni waakhanlene muttupha wa marove nipuro nlo, ekuluwe eyo enoorowa yaakuvaka saana vamuttuphani vo va marove ntoko sinweryaya. Munnona? Mwaha wa xeeni? Okhala wira mukhalelo aya nlelo ekuluwee.

¹¹⁶ Ni mwaha wa yeeyo mamempuru a ekereja, olelo, ansiveliwaaya itthu sa molumwenkuni, moone, okhala wira mukhalelo aya khorukunxiwe. Awo animoolya khula muthinto wa marove a enamukuttho, a teyoloxiyya, masi Masu a Muluku khanwerya ovilela. Awo anoovolowa ni wiiwa Masu. . .

¹¹⁷ Moosuwela, namirima miili muulupalexa mulaponi, ti nakhuku ootakhala. mBibiliani, yaahikhala aili yaahiiwale okhuma mukalawani. Nakhuku ootakhalaxa aahikhuma nave khaatthinke-tho, okhala wira owo marepo, namathola. Owo aamorenle vasulu va makarakasa ookhwa khuvoniha erukulu awe ni nikarakasa nookhwa. Masi vahiyalyawe okhuma epompa, epompa khiyaawenrye ovilela mwaari ole, tivo eyo yaahitthikela owannyaya Atithi ni Nowe, khumana mukhora mpakha Nowe ohiya ovolowa.

118 Vano, nakhuku onniwerya okilaathi vate vale n'ukhuura ekhavalu yookhwa, nihiku nothene, n'uvavela iwe mmatta n'ukhuura enuku ni epompa. Masi epompa khenwerya ovavela iwe n'ukhuura ekhavalu yookhwa, vano-tho okhuura enuku; eyo yaammwiiva. Moone, epompa kherina hata wamwe, ni khenwerya othotiha.

119 Ni okathi khula epompa ya Muluku, khula epompa enlya Masu wala epwittipwitthi, enama yooloka, mwaavahaka itthu sa molumwenkuni, awo annisuwela wira Mwiixuttihi aya oohimya, "Ole omphenta olumwenku wala itthu sa molumwenkuni, ophenta wa Muluku khokhanle mwa yoowo." Nyuwo munoonvaha etthu yoovirikana ni Masu awo a Muluku, owo khonwerya ovilela. Masi xetwani onniwerya waakhela Eyo ni olumwenku nave, ni ohimya wira yothehe ti ya Muluku. Khivanweryaneya otakanxa makhura ni maasi, khanrowa otakanxana.

120 Awo, amakampuusi ala othene, yaanisuwelasa wira ipwittipwitthi saari soohikhalana mukhaliheryo sibirina makampuusi. Ni awo yaari amakampuusi, ni yaanisuwela wira owo ohaana ohooleliwa.

121 Wooniha othunku wona, olelo, wira amphavela olyiha ipwittipwitthi, ihala-hala. Masi epwittipwitthi khenrowa olya eyo. Nnari, mulopwana! Moone, okhuma ottuli wu, awo yaaphavela olyiha ipwittipwitthi, ihala-hala. Nto varwiye-aya Masu, awo yaahilimalelaxa ihala-hala, mpakha yahaasuwenlyaya Masu. Ni ti yeeyo eniireya olelo, okathi etthu emosaru elipihenryaya ni khooniherya wira Muluku aamwiira etthu khata. Vano awo aroolimalelaxa ihala-hala, ni olyihiwa ihala-hala, mpakha nyuwo . . . ahe, khiyaavo enamuna yo olavula n'awo, awo khanrowa wiwelela Eyo, ti yeeyo tu. Mwalapwa . . . Bibilia ohimye wira, "Ntoko mwalapwa sintthikelaawe vamarapheyoni vawe, ni ekuluwe vamaroveni vaya, awo aniira siiso."

122 Anamwiiwa Masu, ni otthikela olukama vamaroveni! Ni wira, "Ah, Iwo onamathipelela. Muhaamini etthu ene ntoko eyo."

123 Muluku . . . ipwittipwitthi sinniira etthu emosaru olelo, iyo sihaana ororomela Masu. Iyo khasinrowa waakhela yoolya ekina. Khimukhanle ovahaka yolya ya enamukuttho, epwittipwitthi y'ekeekhai. Nnari! Nnari! Murowe mwaahimeerye, "Vano nkawehani, hiyo othene ninrowa wiiraana. Vano, Yesu oovekela wira othene nikhale 'mmosaru.'" Nyuwo muhiiwa etthu emosaru oTucson woohikhala khalayi, mahiku vakhani avinre, masi iwo wootha! Yesu khonavekeleke . . . Moota-ni Owo . . . Munwerya sayi nyuwo wiiriha Masu wiivaanya Mmansaya, wiisoopela Mmansaya? Vano Muluku kahiyo-tho oomuvikana mutthu ti mutthu.

¹²⁴ Yesu iirale, “Anwerya sayi aili weetta vamosa ehiiwananaka?” Munrowa waakuxa sayi aMetotista, aPatista, aPrespiteriyaano, ni aKatolika, n’urihela yothene eyo vamosa n’ukhala mmosaru? Nyuwo pooti okhala mmosaru vathi va ohoolela wa mutthu, masi Yesu ohimnye, “Wira awo akhale mmosaru siiso—siiso *Miyo* ni *Nyuwo* nryaahu mmosaru.” Vano, Owo ontthuna wira hiyo othene nikhale mmosaru mwa Yoowo okhanle Masu! Amen! Eyo eri vo, “Mmosa n’Atithi.” Nto Atithi ti Mwaana, mmosaru. Ni awo Masu mamosaru, Masu owooniheriwa, yiisooniheryaka Mmansaya nihiku nla ntoko Awo siiraly’aya khula nihiku nikina, wira nyuwo mukhale mmosaru.

¹²⁵ Nwehe, Owo iirale, “Siiso Atithi akirumyaya Miyo, ni Miyo kinnoorumani.” Atithi yaamurumme Owo, yaahrowa mwa Yoowo wira elipiherye Masu. Ni Yesu yoowo onaaruma atthu Awe, onnirowa mw’atthu Owo onaarumaawe; airaka, “Miteko Miyo sinvaraaka, nave-tho nyuwo munoovara.” Vekeekhai, Owo aahivekela wira hiyo nikhale mmosaru; mmosaru ni Yoowo, kahi mmosaru ni mutthenkeso. Kahi mmosaru ni eyeettihelo, masi mmosaru ni Muluku. Maana Muluku mwa Masu Awe ti Mmosaru, ni Yesu ni Muluku yaari Mmosaru, ni nyuwo ni miyo ni Masu nihaana okhala mmosaru. Ti yeeyo. Nihaana okhala oowiiraana ni Masu. Kahi ele mutthu mukina onihimyaawe, ela kehiyo yo otaphuleliwa v’omeekha. Mukuxe Yeeyo, ele Eyo enihimya’aya, ni mwaamini Yeeyo; nto Muluku onoolipiherya, ni wooniherya wira Eyo ekeekhai. Munuupuwela wira Eyo ti y’awiixutti paahi, mmukuxe mwa Masu Awe, murowe mwehererye emaara emosa moone. Munimoona wira enimoovarelandi muteko siiso Owo silaihenryaawe. Ayo, mulopwana!

¹²⁶ Awo khanrowa olya ihala-hala, sihaana okhalana elyelyo ya epwittipwitthi. Yohani Oowaarya 10 onnihimya yeeyo, “Ipwittipwitthi Saka sinnisuwela Nsu Naka.” Ni vakhala wira Owo ti Masu, nto muthinto xeeni wa Nsu Owo orinaawe? “Ipwittipwitthi Saka sinnisuwela Nsu Naka, oohimusuwela iyo khasimmutthara.” Munnona? Yesu ohimnye wira, “Nsu noohisuwela iyo khasinthara.” Tivo, ipwittipwitthi Sawe khasinthara nsu na oohimusuwela. Iyo khasinrowa waatthara.

¹²⁷ Maprofeta, amakampuusi, ni ipwittipwitthi, othene ankhalela onamoona orwa.

¹²⁸ Vano nkamooneni Muluku ohinrukunuwa mwa itthokiheryo Sawe soohirukunuwa sa Masu Awe nihiku nla. Vano muupuwele minuutu vakhani paahi: Masu ahinrukunuwa.

¹²⁹ Vano nkawehani! Vaakhanle wira—vaakhanle wira Moise aahirwa ni mutthaka wa Nowe, khuwaarowa ovar’etthu. Yohani Mpatisa aaruule-ru ni mutthaka wa Moise khuwaarowa ovara etthu. Yesu aaruule-ru ni mutthaka wa Moise wala mutthaka

wa Nowe, khuwaarowa ovara etthu. Ni Wesley aaruule-ru ni mutthaka wa Lutero, khuwaarowa ovara etthu. aPentekosite yaaruule-ru ni mutthaka wa Wesley, khuwaarowa ovara etthu; ninoomala-ru wiiwa yeeyo okhalela onamoona. Vano, Muluku onoothikela akelelaka ohoolo. Nweheke Masu paahi, moone vatthu varyaahu.

¹³⁰ Nto xeeni wahaarinaaya olaleya woopacerya wa amakampuusi...Vakhala wira maprofeta ala othene, axilopwana ala othene aalupale yaari amakampuusi, vano xeeni Muluku waarinaawe(Ole ohinrukunuwa) orukunxaka inamuna Sawe vaava, ni waaruuhela mateyooloku? Yaari amakampuusi. Orwa wa Mwaapwittipwitthi ooloka voomalela, mukuttho mwaha wa etampi, waahaana orwa wa makampuusi.

¹³¹ Makampuusi onnisuwela ipwittipwitthi sawe oratteene onvikana matthu mukina. Khaavo onsuwela epwittipwitthi ntoko makampuusi, owo t'osuwela eyo. Nave-tho aanisuwela muthinto xeeni wa yolya iyo saarowaaya olya. Awo...owo aahisuwela etthu ipwittipwitthi saarowaaya olya, ni onnisuwela ipwittipwitthi sawe mwaha wa itthu sinlyaya. E...Moonale-ru epwittipwitthi orowa munikhomani mwa ikuluwe opacerya olya ihala-hala, mwamwiira, "Okumihiwe namathola owo va." Munnona? Tivo Muluku aahisuwela nipuro n'owaaroiha.

¹³² Vano nrowe nimuhimye mmosa wa amakampuusi-profeta aalupale a Yehova, wira elipiherye wira Muluku aari mwa maprofeta ala vathi va esapala y'epwittipwitthi. Nwehe vano. Nrowe nimuhimye, toko, Moise. Nrowe ninwehe yoowo. Muteko awe onoononiha Yehova mwa makampuusi Awe profeta. Vano, khino ninoomukuxa mmosa, nakhalanaru okathi, mwa minuutu soophiyaka muloko sinttharelana, ninrowa waakuxa aili aya, masi khino ola onoophiyerya.

¹³³ Moise; Yehova oniisoniherya Mwaneene va, mwa makampuusi-profeta ola. Owo aavahiwe soovaha tthaaru wira alipiherye muteko awe ni wiitthaniwa wawe ohoolo wa ahumu a Isarayeli, ni wa Farawo. Nkanweheni makampuusi-profeta ola, vano. Owo kweekwe, aavaha, maprofeta Awe, ethoonyeryo ya erimu, wira alipiherye wira aari Muluku mwa yaawo; maana khokhanle okhalaka mukhalelo wa Muluku sihikhanle itthu sa erimu siiraneyaka. Yehova khonakhumeleleke y'erimu ehimuttharaka Yoowo. Ehaana okhala. Tivo Owo okathi wothene aahiilipiherya Mwaneene wira Owo aari ni maprofeta ala, alipiheryaka etthu awo yalaleeryaaya, vakhala wira yaari voolikana ni Masu Awe.

¹³⁴ Vano, yoopacerya—ethoonyeryo yoopacerya Owo aavahaly'awe a... profeta-makampuusi ola (nwehe), aatatunxe ekopo awe khukhala enowa.

¹³⁵ Yaneili, ntata nawe naakhalanne maretta.

¹³⁶ Yaneeraru, orika maasi Mmuro Niilu wEjitu, khutatuxa okhala ephome.

¹³⁷ Vano, Owo aahinvaha ithoonyeryo tthaaru wira olipiherye wEjitu, nave-tho wa Isarayeli, wira owo aari Masu a Muluku oolavuliwa.

¹³⁸ Vano, muupuwele, Moise aahilavula khupattuxa! Ti yeeyo. Aakuxale mithaaka khurihela osulu, khwira, "Ithotomwa sirwe," vano ithotomwa khurwa. Khwira, "Iphepele sirwe," vano iphepele khurwa. "Anaphulu arwe," vano anaphulu khurwa. Owo aahiruwa voopattuxa! Vano, mutthu khanwerya opattuxa, masi khaari mutthu opacerya wene. Aari Yehova mwa makampuusi Awe profeta! Amen!

¹³⁹ Nwehe! Ethoonyeryo yaneeraru Owo aanvahaly'awe khiyaarina-vo etthu ni muteko awe, nnakhala khiyaarina-vo etthu ni omutthu awe; ethoonyeryo awe yaneeraru. Nwehe, ithoonyeryo piili soopacerya saamwaasya yoowo, mwaneene ni muteko awe. Ni iyo saari ithoonyeryo piili paahi Bibilia onihimy'awe wira "saahikhalana nsu." Ethoonyeryo ekina khiyaarina nsu. Masi ithoonyeryo piili saavahiwe-awe mwa omutthu awe, ni w'atthu awe, saahikhalana masu. Masi ethoonyeryo yaneeraru, vano nwehe, yaavahiwe. . . ethoonyeryo, ethoonyeryo yaneeraru, yaari ethoonyeryo ya okhwa: maasi athatuwaka okhala ephome. Yawinyu—yawinyu—ephome anyu yaathatunwe—ru maasi, vano nyuwo mwaamukhwa. Nto vaavo vari ephome, ephome yoomwaraxiwa, ethoonyeryo ya okhwa; tivo yaari wa Farawo. Yaneeraru waari otatuxa maasi a Niilu okhala ephome, waari omoonihia—omoonihia Mutthaka awe Farawo wira Muluku ahu Muluku vasulu va Niilu, vasulu va muluku a Niilu. Owo Muluku vasulu va itthu sothene, ni Owo onoorowa oruhela okhwa elapo ele. Nto eyo t'ile yaari ethoonyeryo y'ephome. Oh, wulu! Ethoonyeryo yo okhwa: ephome!

¹⁴⁰ Masi piili sikina saahikhalana masu a oprofeta. (Miyo—miyo—miyo kinroromela wira vano munsoma, muhina-muhina, etthu enihimyaaka.) Masi ithoonyeryo piili sikina saahikhalana masu a oprofeta wa Isarayeli yaahimya s'ohoolo waya. (Vano wa nyuwo mwaari vamwaako wu woohikhala khalayi, okathi nluku naariheliwaya osulu.)

¹⁴¹ Vano, ni orowaka. . .owo aarowa orukunxa mukhalelo, wira ovarihe muteko wo waacalela yaawo. Nkawehani mwiri, nwehe enowa, nkawehani Ephareya Yooxeerya, n'itthu sothene Owo iiraly'awe, vano. Nkawehani ekopo ya makampuusi etthukulaka ephiro wira awo avire. Ekopo ele yaari mmatatani mwa makampuusi, yaahivira vasulu va khula epannte ya teyoloxiia ni itthu sothene anamukuttho saahimmy'aya, ni ekopo ele ya makampuusi yahaaholela ovira mwa khula etthu yoohiweryaneya wa mutthu. Okathi Farawo aatthunne

awe wuupuwela wira ikhwarara ti saathoronwe mmyaakoni ni khuyeeherya maasi ale iwe khutatuxa ephome, vano Muluku khumwaraxa mooro Wirimu, ni Owo khuyeehi maralala okhuma Wirimu, ni Owo—ni Owo khuyeeherya itthupo mulaponi, ni sothene.

¹⁴² Owo iirale exeeni? Ni ekopo yeele ya makampuusi, kahi e—eliivuru ya yoosoma, kahi akhili a teyooloku, masi ekopo ya makampuusi! Ninoophiyerya yeeyo muhina mwa minuutu mmosa; ekopo ya makampuusi, Owo aahiira. Kahi e—eliivuru ya mavekelo ya muromolelo, masi ekopo ya makampuusi. Ekopo ya makampuusi ehoolelaka ipwittipwitthi sawe, ekhalihaka ephiro yoowooneya okathi awo yaarowelaaya Masu oolaiheriwa mulaponi. Ethhu xeeni yooreera olelo ya Ekopo ya Makampuusi, olelo, ehoolelaka ipwittipwitthi Sawe orowa Muttetthe wa Natiri; oviraka vasulu va teyoloxiia ni itthu sothene sikina sa olumwenku ola, ni itthu sa molumwenkuni, ni miromolelo, itthu sothene; othukulaka ephiro, ni wooniherya Masu Awe okhala Ekeekhai; Ekopo ya Makampuusi erowaka ohoolo.

¹⁴³ Ni nwehe, ekopo yeeyo ya makampuusi yaahoolela ipwittipwitthi... Munnaamini yeeyo? Owo vekeekhai aahihoolela ipwittipwitthi, owo aahaavuluxa okhuma wEjitu ni ekopo ele mmatatani mwawe. Naamuwerya ohimya yinci-ene ya yeeyo. Masi wira nikwannye mwaha muulupalexa, owo aahihoolela ipwittipwitthi ni khwaaroiha ohukhumuni ale yaakhoottale Yeeyo! Ekopo emosaru yeeyo yaakhanle eparakha wa mmosa, yaahikhala otakhaliwa wa akina. Maasi mamosaru a olaleya wa Nowe yaamooponle, yaahihukhumu olumwenku. Ekopo emosaru yeeyo yaamweettihenrye Isarayeli muttetthe wa natiri, yaahaahukhumu ale yaakhoottale omutthara profeta-makampuusi. Ti yeeyo, yaahikhala ekopo ya ehukhumu.

Ephattu; nwehe moota Muluku onlavulawe mwa ephattu Awe. Naakhalanne—ru okathi paahi. Koolepa yoolepa vale: Muluku alavulaka mwa ephattu Awe. Hiyo khanirina okathi wira nooniherye.

¹⁴⁴ Masi ooniheryaka ohoolo waya, ni enowa y'eporonse vakoponi va makampuusi a ipwittipwitthi (wira owo aaputaputenle enowa ela, mothakoni), ela enihimya orwa wa elivelo y'ekeekhai ya eretta ni etampi.

¹⁴⁵ Ekopo yeeyo yaahithatuwa enowa ohoolo wa Farawo, ni Farawo yoowo aaheererya otakiha ni anamaxintta. Ni siiso-tho aFarawo a vano, n'ale oowiipaka waamini, anamatakiha a mw'erutthuni a Mutthaka, anneererya otakiha etthu emosaru ahisuwelaka onikhumaaya—wo; ni orihela Eyo mwa etthu ya muromolelo, eryeene yootaphuwa mwa yeeyo ntoko etthekeu eryaya yoowaleliwa. Vekeekhai! Masi aneererya otakiha, opaka etakiheryo.

146 Masi, nwehe, ekopo yeela ya makampuusi yaahikhuura inowa sikina. Inowa iye saari vayi? Iyo saari ikopo vathi, ni yaari ekopo emosa paahi yaavenxiwe. “Erimu n’ilapo ya vathi sinoovira,” ohimnye ti Yesu, “masi Masu Aka khanvira.” Eyo enlavula ya ettipiheryo etampi yaarowa orwa.

147 Nave-tho, y’ohoolo ya Isarayeli yaahivaha...nto vaavo kilavunlyaka sa Isarayeli, vano ohoolo...Awo yaahivahiwa ovuluwa mw’epotthani mwa okhwa ni makampuusi-profeta. Awo yaakumihiwe mw’epotthani ni makampuusi-profeta ni ekopo. Munnona? Waari olavula wa Nvuluxa a Isarayeli ohoolo, okhwa mookhwaani, ni omooroni, ni Makampusi-Profeta yoowo onrowaahu omuhimya.

148 Vano, wa othene ele . . . Isarayeli othene ntoko sinsuwelaahu, khaakhenle Masu a profeta-makampuusi, Isarayeli othene khaakhenle. Vano, nwehe, awo yaamwiisinliha. “Oh,” okathi owo aapakaawe miiriya, “owo aari mutthu muulupale,” masi vaphiyenry’aya Mutthaka awe, “eyo yaari yoovirikana.” Ithooneryo sothene suulupale onttharela orwa wa mutthaka musya. Hiyo noosuwela eyo. Mothakoni awo yaahiisinliha, mothakoni, ni khukhwa ikonto sene. Vekeekhai, yaari aili paahi a yaawo yaalapunwe khoopowa wa ale emilyawu emosa ni nuusu, aili wa ale imilyawu piili ni nuusu.

149 Nyuwo muniira, “Eyo...Exeeni yaakhumelenle?” Awo aavalaanihiwa Voohimala.

150 “Othene aya, Munna Branham?” Yesu ohimnye siiso.

151 Awo yiirale, “Axitiith’ihu yaahilya Emana mothakoni, ni yaahiwurya Vamwala.”

152 Nto Owo...Yesu khwira, “Nto awo, othene, ahookhwa,” oovalaanihiwa Voohimala, moone, othene aya.

153 Nwehe awo yaahiisinliha mwaha wa enamuna yoovaherya ya Muluku, yaari mwaha wa yeeyo yaakhwiye-aya. (Vano, nwiriyaane, muhialele miyoonelo iya vakhani sookiserya.) Awo yaahiisinliha! Yaairinhe wira awo akhwe mothakoni, awo yaamwiisinliha mwaha wa enamuna yoovaherya ya Muluku: wa Mutthaka wa mutthu mmosa, profeta, oholela wa mutthu mmosa. Mukileele okathi Muluku otonko awe orumeela nikhuru ntero wira nihoolele. Khamunphwanya mBibiliani. Mutthu mmosa, awo...Masu yaamurweenle Moise!

154 Kore; hiyo othene noosuwela wira owo—owo aahiilikanyihya ni khwiisinliha wira Muluku khaari naxariya, wira etthu ntoko eyo, okhalana mulopwana mmosa ni Mutthaka. Owo iirale, “Hiyo othene n’owaarya. Xeeni hiyo ohikhalanaka muromolelo? Ni xeeni hiyo ohikhalanaka...opaka *ela*, ni wira *ela*, ni wira *ele*?”

155 Muluku khumuleela Moise, “Mwiivalaanihe n’uwo, koophweeleya ni yeeyo.” Ni muupuwele, Yuta onnilavula

etthu yeeyo, mahiku ookiserya. Ti yeeyo, “Awo yaahipweteya moovaanyihanani mwa Kore.” Nave-tho noosuwela etthu yaamukhumelenle Kore ni a—ni akina yaahovenrye Masu a Muluku ni osuwela wa Muluku wa ohoolela wa mulopwan’owo mmosa: khula mmosa a awo aahipweteya.

¹⁵⁶ Vano, hiyo ninwehe Muluku mwa makampuusi-profeta, ooniheryaka itthokiheryo Sawe s’ohoolo mwa nsu na ekanyeryo nintharelana. Vano, nwehe. Hiyo ninnoona eyo *iwe*, vano nrowe niwehe mwa ekanyeryo enttharelana.

¹⁵⁷ Vano, nwehe, owo aaveleliheriwe axinn’awe mw’epothhani, vathi v’ekhapooro, ni Mutthaka wo woopola, ni ethoonyeryo yoovahiwa ni Muluku wira elipiherye soohimya Sawe. Isarayeli aahikupali Mutthaka awe, awo yaahaamini Yoowo, othene aya, masi okathi wa makaaripi. . . Awo yaahikupali miiriirya sawe, masi okathi wa makaaripi okathi awo. . . owo aavahalyaawe Mutthaka awe, “Waari woovirikana.” Othene ole ahaaminni Mutthak’owo, aahikhwa. Ti yeeyo. T’uvi waari Mutthaka? Mutthaka waari wa ehukumu jaarwa. Makaaripi, okathi wa makaaripi, Muluku aahiviravira vapuwani va Isarayeli wira oone sintoko atthu yaahaamini Mutthaka wa makampuusi-profeta; ni othene ale yaahaamini Yoowo, yaahipweteya.

¹⁵⁸ Vano nwehe, ninrowa oruha eyo wa Makampuusi Muulupale muhina mwa okathi vakhani paahi. Munnona? Nwehe muteko wa Makampuusi-Profeta Muulupale. Vanihimmwa miiriirya Sawe, khula ekereja yaanithukuwa vano yaanimwaakhela Owo. Awo yaanithuna aretta aya ovonihwa. Awo yaanithuna wira itthu suulupale. Osuweliwa wawe waari wuulupale. Masi vaphiyalyaya okathi wa makaaripi, nihiku nimosa Owo aatatunxaawe maasi khukhala eviinyu, ni aalyinhe—awe atthu ikonto sene, ephaawu, ni aapanke awe miiriirya, Owo khupacerya okilaathi n’ulavula ni yaawo. Vano Owo khwaleela wira, “Miyo n’Atithi Aka nri mmosaru. Nyuwo muniira wira, ‘Nooniheryeni Atithi?’”

¹⁵⁹ “Oh, munna! Mulopwan’ola aikhalihaka oolikana ni Muluku?” Eyo yaari yootepaxa wa muupuwelo aya wa onamukuattho. Masi yaari Ekeekhaii, Owo taaryawe! Munnona? Masi vairaly’aya siiso, anci-ene khiyaamutthanre Owo.

¹⁶⁰ Vano Owo khurukunuwa khwira, “Mwaahikhuure—ru Erutthu ya Mwaana a mutthu, ni mwaahiwurye—ru Ephome Awe, nyuwo khamunkhalana Ekumi mwa nyuwo.”

¹⁶¹ Vano, munuupuwela wira mutthu oosuwela, ni ootthokelela aarowa wuupuwela exeeni? Miyo kinnitthokelela wira anamukuttho yaamulattunle Owo orowa mpaani m’okokhorela khiyareere—khiyaareere wuuliwa muru o—omuroiha Owo weiwe. “Wuupuwela wira mulopwana aanvenya ahimye etthu ntoko eyo, ‘Mwaahikhuure—ru Erutthu Aka, n’uwurya Ephome Aka.’” Khwiiriwa, “Ola namawurya ephome ya atthu, moone,

‘Okhuura Erutthu Aka ni owurya . . .’ Vano, owo namaakhuura atthu. Nyuwo atthu a muupuwelo wooloka mu . . .mwiihuluxe nanvariwa ni mweeri ntoko owo.”

¹⁶² Owo khonaleeliheryeke Eyo, Owo aarohimya paahi! Owo aahimenrye wira aakwattule, wira avalaanihe ipwittipwitthi Sawe ni ipuri. Owo iirale eyo wira aathweelelihe. Vano nto khaavo aatthuna wiiwanana ni Yoowo. Awo khayaakhenle wiiwanana okhuma vaavo mpakha ohoolo. Munnona?

¹⁶³ Nwehe, okathi wa makaaripi, Muluku aahikhuma aviraviraka mmaxaaxani wira amoone ole aaminni. Ni Owo iirale etthu emosaru mahiku a Makampuusi Muulupale. Nkawehani muteko wa Makampusi-Profeta, masi nwehe ela, wa alipa-oowaamini a Mutthaka Awe, masi kahi . . . Mutthak’ola wa makaaripi, awo khayaarowa waamini Owo. Awo khayaarowa waamini wira Owo aari Muluku. Awo yaatthuna omukhaliha Owo mutthu ooreera murima. Awo yaatthuna omukhaliha Owo profeta. Owo aari mutthu ooreera murima, ni Owo aari Profeta, masi Owo aari oovikana yeeyo. Owo ti mwiixuttiho wowuulaaniwa olelo, wira “Owo mutthu ooreera murima paahi, owo aari profeta.” Owo khaari hat’etthu woohikhala Emanuweli! Owo aari Muluku oowooniheriwa mwa Yesu Kristu Mwan’Awe, emukhalihaka Owo ni Atithi mmosaru. Ti yeeyo tu Owo aakhanly’awe okhalaka.

¹⁶⁴ Zakariya 14:7, kaamuwerya ohimya ela, onnilavula sa Waarya wa makaaripi emaara ekina okathi wookiserya. Mooweha yeeyo? Othene yaamutthanre Moise, yaahoonu Nripu na Mooro nenlo naamusuwanyehale Vamwaako Sinayi. Owo aahikhalela onamoona, ni aahilavula sa Nripu nla na Mooro naari vatakwarihwani ni naamuleenle Mutthak’ola, anci-ene aya khayaaminni Yoowo. Masi othene ale yaamutthanre okhuma weJitu, yaakhumme molumwenkuni khulapuwa ephareya yo ovalaaniha, khurowa mothakoni, yaahoonu Nripu na Mooro nenlo owo aalavunly’awe nimulipiheryaka makampuusi-profeta owo ntoko makampuusi a ipwittipwitthi, awo yaahoonu Nenlo, ni anci-ene aya nlelo khayaaminni yoonale-ene.

¹⁶⁵ Nwehe mootu, emaara ekina, Muluku ohinrukunuwa, Makampuusi-Profeta Muulupale, aaroihale-awe Omwaako wa Olivera ale yaahanle ni Yoowo ni muteko Awe; Makampuusi-Profeta Muulupale, Ole hiyo onimuhimy’ahu, Yesu. [Nipuro vahiitthu mufiitani—Mol.] . . . ? . . . ni yaahiwiwa Atithi, Nripu na Mooro nenlo, omulipiherya Owo, naamulipihenrye Moise.

¹⁶⁶ Muluku yoowo Moise aamuhimye awe, aahirwa vasulu va Moise ni khooniherya ni Nripu na Mooro wira Owo aari Yehova aamuhoola Moise. Muluku aari mwa makampuusi Awe profeta.

¹⁶⁷ Va Owo onimukuxa Makampuusi-Profeta mukina, Profeta Muulupale, Epwittipwitthi Y’ekeekhai, Yesu, ni onaathanla atthu araru, khwaaroiha vasulu va Mwaako Olivera, nto

vaavale khimulipiherya Yesu. Ni hata aahiivalaaniha Mmansawe w'atthu othene akina, khwira, "Ola Mwan'Aka onimphentexaaka, mmwiiweke Yoowo!" Nto awo vawehalyaya osulu, khiyaamoonale hata mutthu woohikhala Yesu paahi. Ti yeeyo. Owo taari Mutthu ene. Vano, eyo ennimaliha mwaha, ntoko sinsuwelaaka. Munnona?

168 [Nipuro vahiitthu mufiitani—Mol.]...?...[Nipuro vahiitthu mufiitani.]...?...wiitho. Moise aari ohoolo wa Shekinah oMwaako Sinayi. Eyo yaahirukunxa ethoni awe. Okathi owo okhurunwaawe, owo aahaana o—ohela ekuwo wiitho wawe, makampuusi-profeta Moise; yoowo Yehova aary'awe-mo, mwa epante, epante emosa paahi, ethoni awe. Owo aarina Masu mwaano mw'awe.

169 Masi nwehe okathi Makampuusi Muulupale aaryaawe ohoolo wa Shekinah. Eyo yiirale exeeni? Eyo yaahirukunxa ethoni Awe yothene. Owo khaari epantte ya Muluku paahi, Owo aari othene Muluku! Owo aari Emanuweli.

Xeeni akelaka okhala amakampuusi?

170 Nkawehani! Moone, vano, Muluku Oowerya sothene oneettelela...aisooniheryaka Mmansawe, kiireke, mwa Moise makampuusi-profeta. Nwehe moota Muluku aaisuwelinhe-awe. (Ela ti yoohimya aka yookiserya.) Mmoone, eemenle-ene oottitkittheliwa ohoolo wa Nripu na Mooro! Oohikhala mutthu vamwaako mara woohikhala Moise ni Yehova. Amen! *Amen* enihimya "ekhale siiso."

171 Nwehe! "Muhele ntata nanyu vatthirima vanyu!" Masi, nwehe ekanyero ela yaneeili vano ni nsu. "Muhele ntata nanyu vatthirima." Khanirina hata exariya yo waamini wira Moise aari nnyootho, khino owo aahaana wira ohenle-ene ntata nawe nnyootho vatthirima vawe, okhala wira alopwana anci-ene t'a ntata noolopwana. Owo aahihela ntata nawe noolopwana... Vano nwehe! Elatarato xeeni enoonaahu va, ya Yehova mwa Moise makampuusi-profeta! Moise amuthoonyeryaka Muluku, okhala wira Muluku aari mwa Moise. Munwehe owo ohela nawawe... "Ntata vatthirima vanyu." Ethoonyeryo xeeni!

172 Vano, owo ori vale, avarelaka ntata nawe vamurimani vawe (eemenle *sa*) weiwo isiiri sowiipithihiwa sa ovuluxa saaipithihiwe-aya okhuma woopattuxiwani w'olumwenku. Va ti mwaha yaakhalenlyaya amakampuusi. Yesu ti ntata noolopwana na Muluku, hiyo othene noosuwela. Vale ori Moise amooniheryaka Yoowo voolikana. Owo aasuka isiiri s'Atithi, ni ooonooniherya seiyo. Nwehe, nkanweheni owo okumiha vatthirima vawe ntata nawe noolopwana nirina maretta oowiiva. Aahooniherya etthu Muluku aarowaawe wira ni Ntata Nawe noolopwana. Nwehe, maretta khanvoniwa. Nwehe, emaara ekina, khayaari maretta ene paahi, yaari mukhalelo aya wookiserya, ootteela ntoko etthapwe; ntata nawe

naarophwanya ethhu yoowoopiha. Moota Moise oonalyawe okathi okumihalyawe ntata nawe noolopwana vamurimani vawe, vatthirima vawe, nto ntata nawe naarina maretta! Maretta anthoonyerya etampi, oohivoniwa, vanci-ene mwa mukhalelo aya wookiserya.

¹⁷³ Nto, axinna, ti vaavo olumwenku waary'aya okathi Muluku okuminhe awe Ntata Nawe noolopwana vatthirima Vawe! Olumwenku waahivulala ni maretta oowiiwa, ni oohikhalana ovoniwa nnakhala. Siiso t'uryaya ohiy'ula, okhala wira awo khanaakhela murette. Murette opakiwe oKalvario, masi athu antthuna okuxa elepelo murette yoopakiwa ni mutthu ohiya elepelo murette ya Muluku wa etampi.

¹⁷⁴ Nwehe wira khiyaarwiiye vakhani-vakhani, ntoko eyeettelo ya maretta eniiraaya, masi naanaanoru! Vakumihalyawe ntata nawe, naahivulala, naari noosareya maretta. Nwehe ethu Muluku ehimmy'awe, "Vano, khamunrowa vakhani-vakhani ohapuwela mutampini; masi nihiku ninrowaanyu olya, nihiku nenlo munookhwa." Ni eyo ekeekhai, "Nihiku ninrowaanyu olya."

¹⁷⁵ Nwehe, aari makampuusi-profeta aavulalinhe mwaneene. Owo aakuxale, ni yooruma ya Muluku, khuhela ntata nawe vatthirima vawe, khukumihla nivulanle ni maretta. Makampuusi-profeta iirale mmansawe. Nto Profeta-Makampuusi Muulupale, Yesu, iirale Mmansawe, "Miyo kinihela ekumi Aka, khaavo onikumihla mwa Miyo." Owo aari Makampuusi Muulupale, Profeta-Makampuusi Muulupale, "Khaavo onikumihla mwa Miyo, Miyo kiniira Mmansaka." Nwehe khiyaaruule vakhani-vakhani, yaaruule muhina mwa minuutu mmosa. Makampuusi Muulupale, Mwaneene, aakunxe ottheka wahu khwiivulaliha Mmansawe, okunxe itampi sahu Yoowo khutthepa. Khivanxankiha namalepa olempe awe:

Eriyari ya miyala soopharuliwa ni irimu
sooriipela,
Moopoli aka aahuuramiha muru Awe
khukhwa;
Okhereya w'ekuwo ohooniherya ephiro
Wa otthapa wa Wirimu ni nihiku noohimala.

¹⁷⁶ Esiiri ile yaari vatthirima va Muluku iyaakha iya sothene, sookhuneeliwa ni ntata Nawe noolopwana, Yesu. Makampuusi Muulupale onikuxerya mwa Yoowo soottheka sahu. Yesaya 53:6, ohimnye wira, "Owo ohaaxeriwe mwaha wa soottheka sahu. Owo onyakatteliwe sootakhala sahu. Ehukhumu ennivaha murettele yoomulemela Yoowo. Ni makhwatta Awe t'anivoninhe." Esiiri ya ovoniha wa Muluku yaaphwanyaneya vatthirima va Yesu Kristu, ahiiso ya Muluku, Owo aari moonoo woolopwana wa Muluku, eyo ti Epwittipwitthi emosa paahi yaasuka vatthirima Vaya esiiri. Mwaha wa yeeyo wooniheriwa

wa Yeeyo kweekwe yaahaana okhala epwittipwitthi! Yoopacerya yaari epwittipwitthi, yookiserya yaari Epwittipwitthi. Mwaha wa yeeyo Eyo jaarinaaya orwa wa makampuusi, wira asuwele moota w'okhapelela Ipwittipwitthi Sawe. Munniiwa? Nwehe, "Owo ohaaxeriwe mwaha wa sootheka sahu, onyakatteliwe sootakhala sahu, ehukumu ennivaha murettele yoomulemela Yoowo."

¹⁷⁷ Nwehe, jaarwiiye voowaakuva; ni yaaronwe voowaakuva, nimalakaru ntata noolopwana okumihwiwa vatthirima emaara yaneeili. Eretta yoowiiva yaahikhuma, okathi owo okumihalyawe emaara yaneeili. Ni okathi Makampuusi Muulupale, Profeta-Epwittipwitthi, okathi Owo ohimalyawe. . . Vamwiikimanyo w'oKalvario, okathi Owo onilivenrya-awe ehukumu ya etampi hiyo othene, Owo iirale, "Yoomaliheriwa." Etampi yaahimala, ehukumu yaahilinwa, iteeni saahimalihiwa! Khiwaavinre mwaakha, ahiiso vookiserya khiyaakhumelenle nnakhala mahiku a namareherya mukina wa etthu, yaahimaliheriwa vaavale vene!

¹⁷⁸ Etampi khukela mwa okathi, mwaha wo ohonona Ekano ya Muluku, mwaha wo ohonona Nuulumo nimosa. Ohiy'ula, axinn'aka, munepa anyu ori vasulu wo omooroni vanikwicilini. Nto nikwicili nlo khuhiyo mwiixuttiho wa teyoloxiyya wa oseminaariyu, nikwicili nlo kuhiyo muromolelo wala eyaaminelo munikhalaanyu mweettelaka, nikwicili nlo ti Masu a Muluku! Yesu aahivaha nloko n'atthu Masu Awe wira akhaleke yeettelaka, nto Hawa khukwasa nlutte nimosa naamukhaani na Yaawo. Nto e. . .khula nikwicili khanihiyo noolipaxa ovikana vanlутtenni vaya nootteettheyaxa. Nyuwo mwakumiha-ru Nuulumo nimosa. . .Eyo ti yaari woopaceryani wa Eliivuru.

Yesu khurwa eriyari ya Eliivuru, khwira, "Mutthu khankhala mukumi ni yoolya paahi, masi ni Masu othene ankhuma mwaano mwa Muluku." Eyo yaari eriyari ya Eliivuru.

Wookiseryani wa Eliivuru, Owo iirale, "Ole onrowa okumiha Nuulumo nimosa (otaphulela vooonyeya Nuulumo nimosa), okumiha Nuulumo nimosa Va, Kinookumiha mpante awe Muliivuruni mw'Ekumi." Munvira vasulu va omooroni, mwiithomeiye vasulu va Masu a Muluku. Muhimuhiye mutthu ohela etthu mwa nyuwo ehikhanle SIISO ANIHIMYA T'APWIYA!

¹⁷⁹ Oh, kinnoona. . .Ahe, awo aniira, "Vekeekhai, sothene siniiraahu. Sothene siniiraahu!" Ti yeeyo khino anamukuttho aalupale ni akina yuupuwenle-aya mahiku a Makampuusi Muulupale. Ti yeeyo Hawa uupuwenle-awe. Ti yeeyo Satana aamuleenle-awe, "Vekeekhai Muluku khoniira." Masi Owo aahiira, okhala wira Owo aahimye wira aamwiira. Ni mwaha wa yeeyo Owo onrowaawe wira-tho olelo.

¹⁸⁰ Khivanxankiha, ntoko Owo sihimaly'awe, "Ntoko saaryaaya mahiku a Nowe, yaawo minepa s'atthu athanu n'araru yooponwe aya, ni maasi, siiso enookhala orwa wa Mwaana a mutthu." Moone, vakhaanixa, "Okhala wira mukhora ti woophunyeya, ni ephiro ti yoorika enroiha mw'Ekumini, nto ale amphwanya eyo ari vakhani." Ti yeeyo. "Okhala wira ephiro yoowookowa t'ile enroiha moorimeelani, anci-ene anoorowa ovolowa yeeyo."

¹⁸¹ Okathi Makampuusi Muulupale ovulalihiwaawe, Profeta-Epwittipwitthi Muulupale, okathi Owo ovulalihiwaawe wu, Owo iirale, "Yoomaliheriwa!" Nto minuutu yoowo, omalakarū ovulalihiwa Makampuusi ola, yaahimala. Etampi yoomalihiwa, khiyaakhanle-tho etampi. Awo yaari oorerela, ehukumu yaahilinwa. Alipa-oowaamini yaawo masina aya yaalempwe Muliivuruni mw'Ekumi, ootthommwa okhuma opattuxiwakaru olumwenku, yaahimalihiwa minuutu ene yoowo Yesu aahimyaawe wira yoomalihiwa. Owo, Makampuusi ule Muulupale, aarweenle ipwittipwitthi Sawe. Yaahimalihiwa, ntata noolopwana na Muluku naahikumihiiwa vatthirima Vawe, noovulalihiwa. Vano oPaasikhani Owo aahitthikela okeliha (amen), khuvenxa-tho vatthirima Vawe, ni khunookolela nyuwo ni miyo, mwa mukhalelo wa Masu Awe, wira anivuluxe hiyo nitthikele omatta yoopacerya weiwo etampi enikuminhaya-wo. Esiiri yaipitihiiwe ya murima Awe muulupale yaahuupululiwa ni Profeta-Makampuusi. Yuupululiwe ni Makampuusi, Profeta-Makampuusi.

¹⁸² Khivanxankiha miyaako saatuphaly'aya khunyakula nihiku nle. Khivanxankiha nsuwa niipitihale-aya wiitho waya ni khukhuwela mwaha wo otthapa. Khivanxankiha ephattu yothene yaataphuwale-aya; etheku yaahittikinya miri mpakha saatikinyeie-aya khuttikinyeya, ni khutthapa, ni khutupha. Iyo saahimoona Profeta-Makampuusi, vamwaako, ovuluxa khula nsina Muliivuruni mw'Ekumi. Ni saahoona wira ephattu aya yaahivuluxiwa! Iyo saahikhuwela, khutupha. Ni olumwenku waahikela mutetereni. Ni miyaako saahipharuwa, ni miyala saahimora. Ni nsuwa naahiipitha. Ni—ni sothene saahiiraneya. Ntoko khula muthukumano, Makampuusi awuupululelani-ru wira "yoomalihiwa!" Vaavo. . .

¹⁸³ Miyo kihooona ikwanyuwelo s'otupha, ni ikwanyuwelo s'otthapa, masi khaakhanle mutthu aawereieye. Miyaako saahinyakula, ni iyo. . . nsuwa naahitupweela, ni sothene saahiiraneya, masi khaakhanle hata mutthu oowereeya. Ni kihooona mithukumano vaavo owerya wa Muluku wuupululeliwaya atthu wira awo "yaahitaphuwa mwa olumwenku ni itthu sa molumwenkuni," ni otthapa w'Apwiya khusariha muthukumano. Awo khweemela khukhuwela, khunla, khunykula yiituperyaka, wa ovuwa wa Muluku. Nkinatoko wooka etthu yootepanyeya, awo kweekwe yaari voolikana oratteene; okhala wira awo yaahisuwela wira, nsina naya

naahilempwa Muliivuruni mwa Ekumi ya Mwaapwittipwitthi ohinatthi opattuxiwa olumwenku. Profeta-Makampuusi muulupale aahaaruuhela Mutthaka, vano awo khuvuluxiwa, Profeta-Makampuusi. Voohicala enamuna xeeni mikhalelo sikina sa enamukuttho saahimiyaya sa Yeeyo, awo yaahisuwelasa etthu yaakhumelenle. Siiso ntoko amakampuusi ale iwe yaasuwelanse-aya, awo yaahisuwelasa etthu yaakhumelenle.

¹⁸⁴ Khaavo mutthu orina ehaakhi yo weemela ottuli wa epulpitu yooreerihiwa wira alaleye Masu mpakha owo iire ntoko Moise siiralyaawe, okumana ni Muluku, mwaneene, vapuwani vaavo ohikhanlyaya hata teyooloku onwerya omukumiha ataphulelaka Yeeyo. Moise aari vaavo! Hata wira anamitthaka a Isarayeli yaahimya sayi, “oh, yaari ethiru, nyuwo murimuupuwelela paahi wira muhoona yeela; eyo ethiru,” khivaaweryaneya omukumiha Eyo, owo aanisuwela! Owo aari weiwe! Owo aari ole yaamukhumelenle! Ni khaavo mutthu ni e—ekharawu ya teyoloxiia wala ekharawu ya etotori orina ehaakhi yo okhala ottuli wa epulpitu, wira ahimye Mutthaka wa Yesu Kristu, mpakha owo akumane ni Muluku toko ethoni ni ethoni Munripuni na Mooro. Owo khorina ehaakhi yo wiisiitthana namitthaka, okhala wira mateyooloku othene molumwenkuni khiyaawenrye okumiha Eyo mwa nyuwo ataphulelaka. Ehookhumelelani nyuwo! Nyuwo mwaari vaavo, moosuwela ya Yeeyo. Voohicala etthu mutthu mukina onihimyaawe, wala moota xeeni awo akhanlyaya wiiraka, “mahiku awo aavira, kahiyo siiso,” nyuwo . . . eyo ewiinreni nyuwo, ni ti voolikana ni Masu.

¹⁸⁵ Ayo, mwaha wa yeeyo Moise aasuwenle-awe wira Nsu nla naalavunle ni yoowo, naari Nsu na Masu. Owo aanisuwela wira Muluku aahimuleela Abrahamu, “Osuulu anyu onoorowa weetta elapo ya amalapo miyaakha imiya xexe, masi Miyo kinimwaavuluxa.” Ni owo aahisuwela wira miyaakha imiya xexe saahiphiiyera ni owo aahiitthaniwa wira aire.

¹⁸⁶ Alopwana n’athiyana, Muluku oolaiherya mahiku ala ookiserya wira Owo aamurowa waamwaraxela Erooho Awe atthu othene. Owo aahilaiherya wira aanveleeliha Opatiiso wa Erooho Yoowaarya, ni wira Owo aammwiitthana Mwaakameliwa ohirina nlepa wala ninnyaari. Owo aahilaiherya wira, Owo onimwiira. Muhiwiiwelele amakampuusi ala anilinvwa, awo animoothweelelihani. Erooho Yoowaarya ti Makampuusi wira yoolyiheni yoolya ya Masu ala. Kweekwe enoorwa ni Makampuusi. Owo ti Makampuusi ahu. Mmwiiwe Yoowo, nyuwo mwa ipwittipwitthi sa nikoto Nawe; mwaari yoowo, munimwiiwa Nsu Nawe. Kahi ele mutthu mukina onihimyaawe, nyuwo munniwa etthu Owo onihimyaawe. Nsu nootikiniha, nyuwo khamunsuwela hat’etthu na nenlo.

¹⁸⁷ Oh, wulu, mmwiiwe-tho makampuusi-profeta oowerya ataphulelaka ni aisuwelihaka wa yaawo, Yohani, okathi weemenlyawe omuro Yordani, nkawehani etthu owo

aahimmyawe, eemenle-ene vale alaleyaka, owo iirale, “Okathi onimoorwa . . .”

¹⁸⁸ Nwehe, Yohani aari mwaana a namukuttho. Awo kweekwe yattharaka e—ephiro y’atithi aya, ti siiso hiyo nrinaahu masina ahu, mwa etthu p’itthu awo yiiraly’aya, awo yaawitthana siiso. Ni Yohani aahaana okhala namukuttho ntoko tiithi awe.

¹⁸⁹ Nto, moosuwela, ame awe, okathi yaarupanlyaaya, Nlaikha n’Apwiya vaamanlyaya okumana ni atithi awe Zakariya, vano khurowa owaani wa Elisapeeti, ni owo aahikhalana miyeeri mithanu na mosa, wira akhale maama, masi khaarina ekumi nlelo, owo aahituthuwa okhala wira mwaana khaattikinyeya. Eyo kahi yoolikana.

¹⁹⁰ Ni Erooho Yoowaarya, Nlaikha n’Apwiya naahimukhumelela Maria, khimuhimeerya wira owo “ aarowa okhalana mwaana, ahimusuwelaka mulopwana,” ni khimuleela mukhalelo wa Elisapeeti.

¹⁹¹ Owo khurowa mmyaakoni w’oYuteya, wira amuleele Elisapeeti. Nto okathi okumanne-awe ni Elisapeeti, aahimuleela wira “aarowa okhala maama.” Ni khaawerya osuwela saana, “ahimusuwelaka mulopwana.” Masi owo khwira, “Erooho Yoowaarya erookikhupaarela, khwira wira Ookhala ola Oowaarya onrowa oyariwa ni miyo onrowa wiitthaniwa ‘Mwaana a Muluku,’ ni kinrowa omwiitthana Nsina Nawe ‘Yesu.’” Nto emaara yoopacerya nsina Yesu naaromoliwaaya ni eyano ya mutthu, mwaana mukhaani ookhwa, mmurimani mwa ame awe, aahitupha mwaha wo otthapa ni aahikhuwela; ni khutupha mmurimani mwa maama, ni iira ahinaakhele ekumi nlelo.

¹⁹² Nsina na Yesu Kristu naahilavula ekumi wa mwaana aakhwiye. Eyo yaahaana wira exeeni mukereja enihimya oyariwa vasya?

¹⁹³ Nto hiyo ninkilaathi oonyuunya ntoko epharamela vamuxirini, ni otthuniherya wira itthu iyo sikeleleke ohoolo. Ni woova ovenya ni okhalela onamoona ekupalelo ahu, ni opwapwela ethiru ela yothene, omukhaliha Yesu Kristu mmosaru nsana, olelo, ni mahiku othene. Ola okathi wa Natale, mwaakumihe aPaapa Noweli ala ni itthu, ni ethiru iyo ya nakoso. Mwiiwale yayi sa Paapa Noweli mBibiliani? Eyo ehantisi ya oRooma, khiyaavo etthu ya yeeyo nnakhala, khiyaavo etthu ene eyo. Muhaaxuttihe an’inyu ethiru ntoko eyo. Nihiku nlo muhaana omuleela wira yothene eyo waari wootothiwa woomalela, vano moomoototha mwan’inyu. Ni eyo enoohonona onamoona anyu wa Yesu Kristu, owo onimwiira, “Khino Eyo etthu emosaru.” Mmuhele-tho Yesu Kristu Makampuusi-profeta Muulupale muNataleni vaavo oniiraawe mpantta.

¹⁹⁴ Nwehe, munwiriyane profeta ola, Yohani, eemenle-ene vale. Hiyo othene noosuwela wira owo aari makampuusi-

profeta muulupale. Vano, owo aahikhalana mutthaka, Nlaikha naanisuwela wira owo aarowa omooniherya Yesu.

¹⁹⁵ Vano, owo khaakhanle orowaka osemiariyu. Awo yaamwiira, “Vano, nyuwo moosuwela wira Totori *Lexe ni lexe* t’okhanle mutthu oothuneya wira akuxe opuro owo vano. Ti nyuwo munrowa omooniherya. Ni nyuwo moosuwela wira paahi . . .” Moone, owo khaakhanle wiitakanxaka ni mutthu.

¹⁹⁶ Oryeene miyaakha mithanu ni mixexe, ninihimeeriwa wira, owo aaronwe mothakoni wira ailokiherye ohoolo wa Muluku. Ti weiwo amakampuusi ankhumaaya-wo. Nwehe mutthaka awe khuwaari ntoko teyooloku, ni elavulelo, ya moolumo maalupale ooratta a ekharawu. Owo iirale, “Oh, nyuwo nloko na ivili.” Aaleelaka athu anatiini, “Nyuwo nikhuru na ivili.” Ti yeeyo owo oonaly’awe mothakoni, owo oonale evili. Ethu yootepaxa okhala ya vathi owo aawenryawe ophwanya, ni owo aawitthanne anamukuttho n’anamukerejani ni mateyooloku a nihiku nle, “Nikkhuru na ivili!” Khwira, “Taani ooleenleni wira mutthyawe oviruwa onrwa? Muhipacerye wira, ‘Hiyo niniira mpantte wa *ela*, ni mpantte wa *ele*,’ maana kinooleelani wira Muluku onniwerya otatuxa maluku ala ekhale aana a Abrahamu.” Maluku, ethu owo oonaly’awe mothakoni. “Nave-tho, epaso yooheliwa vamutathaarini wa mwiri.” Ti yeeyo owo aakhanly’awe oonaka: inowa, miwo, mothakoni. Nto, moone, owo waari mutthaka awe. Owo khaasuwela moolumo maalupale oowiipelana totori mmosa muulupale a divindad, aawerya omukumiha amutaphulelaka, owo aalaleiye paahi voolikana ni enamuna ya ephattu.

¹⁹⁷ Ti yeeyo hiyo enoonihaahu va: ekopo ya makampuusi, makampuusi, epwittipitthi, enamuna ya ephattu.

¹⁹⁸ Owo iirale exeeni? Owo aahikhalana ethu yuulupale yo wira, owo aari ole aarowa omusuwela Mesiya. Owo khwira, “Miyo kiniira, ‘Owo eemenle va eriyari anyu naanaano va. Ni nyuwo khamumusuwela Owo, okhala wira teyoloxiyya anyu khoreere wootthukani, vahinsuwelaanyu veemenlyanyu.’”

¹⁹⁹ Nihiku nimosa Yesu aahirwa eettaka, owo khwira, “Moone, vo onoorwa Mwaapwittipwitthi a Muluku ontipiha itampi sa molumwenkuni.” Mwaapwittipwitthi! Aleluya! Ettipiheryo y’ekeekhai! Vale jaarwa ele khula epwittipwitthi okhuma omatta wa Edeni yaathoonyenrye aya, Mulopwana pure eettaka mpakha mmuratthini.

²⁰⁰ Awo khwira, “Yohani, musuwenle sayi Yeeyo? Miyo nkoonale ethu yoovirikana.”

²⁰¹ “Masi kinnikhalela onamoona, kaahoona Erooho ya Muluku ekhuruwaka ntoko epompa, ni Nsu nimosa nihimyaka wira, ‘Ola Mwan’Aka onimphentexaaka mwa Yoola Miyo onnikisivela okhala.’”

202 Nkawehani Epompa ni Mwaapwittipwitthi. Munnona? Ayo. Ankhi yaakhanle e . . . ankhi yaakhanle etthu . . . Ankhi aakhanle mwiici eemenle-ene vale? Ahe, Mwaapwittipwitthi khaakhanle oorowaka va . . . ahiiso Epompa ele . . . Muluku iithonyenrye Mmansawe ni epompa, oomalela wiisumaaliha w'axipalame othene a wirimu; Mwan'Awe ni ipwittipwitthi, owiisumaalihaxa wa axinama othene mulaponi. Moone, mwaapalame ooloka a wirimu, kahi nakhuku; kahi marepo ootupha, masi epompa. Kahi ekuluwe, masi mwaapwittipwitthi. Khula mukhalelo mukina khiwaarowa wiiwanana.

203 Nto nwehe okathi Epompa eruulyaaya vasulu va Mwaapwittipwitthi, Eyo yaahimuhoolela. Kahi mwa enamuna Owo aathunaawe, masi mwa enamuna Atithi yaamuhoolelaaya. Ti siiso mwaapwittipwitthi eekeekhai okhanlyawe olelo. O ipwittipwitthi sa okathi wa Natale, khamunsuwela wira Muluku onihoolela paahi ni Masu Awe? Eyo ti Ekopo Awe.

204 Nwehe hat'etthu yaarowa wiiraneya, masi Yohani iirale, "Akina aya khayoonale Eyo, masi miyo kinnikhalela onamoono, 'Miyo kihoona Eyo.'" Amooniheryaka: "Mmoone, Mwaapwittipwitthi a Muluku ontipiha itampi sa molumwenkuni."

205 Kitthuniheriwe vano opacerya Mutthaka aka wa Natale, kimalihaka vano: "Yesu Kristu, mmosaru nsana, olelo, ni mahiku othene." Owo Mwaapwittipwitthi yoowo. Owo vekeekhai Mwaapwittipwitthi olelo ntoko Owo saary'awe okathi ule. Owo ori va ntoko Owo saary'awe iwe, okhala wira Masu Awe mamosaru. "Vanthukumanaaya aili wala araru mwa Nsina Naka, miyo kiri eriyari aya." Vekeekhai ti yeeyo Owo ohimmy'awe. Owo khonarukunxeke, Owo Mulukuu Masu. Owo khonrukunuwa; nlelo avahaka ipwittipwitthi Sawe, ni alyihaka ni Profeta Awe Makampuusi, Yolya Awe ya ipwittipwitthi toko. Kahi wa teyooloku; ipwittipwitthi Sawe.

206 Awo khanrowa . . . Vanweryaneya sayi awo akina olya Yeeyo. Masi asuweli . . . Nwehe ela! Masi ale oosuwela ni a akhili, owiixuttihiwa saana a molumwenkuni, nlelo anthuna ohimya wira okhala Paapa Noweli. Ni sookhala inamuna sothene sa ithiru ni itthu awo ankokhorelaaya, okhala wira awo khanrowa omukupali Owo, Masu; okhala wira mmiromoleloni saya, Eyo khenlikana ni osivela waya, amakampuusi oolinwva a nihiku. Oolinwva a eyaaminelo, anrowa otthuna wootakanxani ni epuri, muhaamini! Awo anooweettiheryani oniiviwa inama. Mmwiiwe Makampuusi Muulupale oyariwe miyaakha ekonto emosa ni imiya thanu na xexe khalayi, mweeri ola. Wu woovira okathi, Mmutthakani mw'Awe, khurwa wa amakampuusi eekeekhai yaasuwela moota w'okhapelela ipwittipwitthi.

207 Nwehe, awo nlelo annitthuna. Awo khanrowa okupali Iyo olelo, siiso ntoko awo siiraly'aya okathi ule, okhala wira eyo

khenlikana ni osivela wa enamukuttho aya. Awo anoorukunxa Masu awo ni okhaliha oolikana ni mutthenkeso aya, ni khanrowa olaleya Masu. Awo khanrowa! Awo aniira, “Ahe, eyo yaari ya mahiku a arummwa. Khenihimya *yeela*.” Enihimya vekeekhai ele Eyo enihimya’aya, khemmutthuna hata mutthu o...?... waataphulelela Yeeyo.

208 Vano nrowe okathi ula nuuramihele muru ahu ni murima vatthayani v’elapo, ni naakuvele naanaanoru munlyelya inama, wira noone ni naakhele Waarya Masu ala anniruuheleaya ni Makampuusi: Makampuusi-Profeta Muulupale, Yesu Kristu Mwaana a Muluku. Koopisa koolavulelakani. Khino nkikhalinhe moolumo aka ntoko namukuttho saatthunaneyaawe, nkineererya wira yeeyo. Kimphavela olavula Awo voolikana ntoko Owo sinikinnyaawe.

209 Masi, munnoona mwaha wa xeeni yaarinaaya okhalaka amakampuusi? Akina aya yaari ooxuttihaxiwa ni muupuwelo mukina mpakha awo yaarowaaya waakhela. Ni olelo hiyo nookhalana inamuna sothene sa anamawehaxaxa a atthu othene, axilopwana a etistritu, mapixipu, anamukuttho, makarteyaale, mapaapa, itthu sothene molumwenkuni, wira seererye oneettiherya. Masi Muluku oonivaha Makampuusi, nto Makhampusi owo ti Erooho Yoowaarya.

210 Mukiwiriyaane vano. “Okathi Owo...” (kahi muupuwelo, *Owo* epronome ya mutthu) “Okathi Owo Erooho Yoowaarya enrwaaya (Erooho y’Ekeekhai), Owo onoowuupululelani itthu iya Miyoo koochimenry’akani, ni onimoosuwelihani itthu sinrowa orwa.” Owo ti Makampuusi Muulupale, Owo ti Makampuusi Yesu omuhiyalyawe. Ni Erooho Yoowaarya yoomulepa Bibilia, Bibilia ohimnye siiso, “Atthu a khalayi, yeettihiwaka ni Erooho Yoowaarya, yaahilepa Masu.” Vano, vaamuweryaneya Erooho Yoowaarya wooroihani mwa eyaaminelo? Vaamuweryaneya Eyo wooroihani—wooroihani wa etthu Masu ala ahinihimyaya? Vano, yaamukhala yoohiweryaneya mara. Erooho Yoowaarya yaamukhala nawoothe Eyo yaahimnye-ru wira “*Ela* t’itthu entthuneya nyuwo wira,” vano nto khunarukunuwa ni wira, “Nnari, Waari ovonya, nto mwiireke ele ekereja enihimya’aya.”

211 Vano, nyuwo mwaakhanle-ene mwiiwaka etthu, wala ekina yookuminheni mw’eekeekhai, Makampuusi eekeekhai onrowa oweettiheryani Mmasuni, Erooho Yoowaarya, nyuwo khamurina musuwelelo, ni khamurina namoona a Erooho Yoowaarya mmakhaleloni mwanyu, yeeyo ehikhanle . . .

212 Muluku Mmosa. Muluku ti mmosa paahi orina Ekumi Ehinimala, ni Owo ti Ekumi Ehinimala. Ni etthu p’itthu yaarina epacerelo yookhalana emalelo. Ni nyuwo mwaari mempuru a ekereja paahi, yaahikhalana epacerelo. Masi Masu a Muluku kharina epacerelo, Muluku khorina . . . Ni okathi oniyariwaanyu ni Muluku, muniyariwa ni Masu, vano munkhala mwaana

a Muluku, ni nsina nanyu niheliwe muLiivuruni mw'Ekumi ya Mwaapwittipwitthi ohinatthi opattuxiwa olumwenku. Ni nyuwo, nthepa na maihi murinaanyu, nthepa na maitho murinaanyu, erakamelo anyu, Muluku aahiwoonani ohinatthi opattuxiwa olumwenku. Ni Owo aahiwoonani, mutthu, ntoko siryaanyu. Ni hata iyaakha emilyawu sinrwa, khiyaavo enwerya wookhoottiheryani othhikela ekhalelo eyo yooloka Muluku ootthokihenry'aweni wopaceryani, "Ipwittipwitthi Saka sinniwa Nsu Naka, oohimusuwela iyo khasimmutthara."

²¹³ Nto nyuwo mwiira muhikupanli Ekumi iyo Ehinimala, ohiy'ula, ni munweha e—e—ehantisi yoowuupuweleliwa ya mwaana ommaathale mwa—mwa—mwaalyelya inama, ni nikhuru n'axilopwana asuweli emurukurenrye, muhaaminiki itthu ntoko eyo. Ni mutthunaka wuupuwela, "Ahe, miyo kinookhala ooreera murima. Ni kinimwiira *ela*. Ni kinimwiitakanxa mukereja. Nto ti yeeyo tu entthuneya miyo wira." Moopweteya. Mwaahikhalane Ekumi Ehinimala, munwerya sayi okhala voohimala?

²¹⁴ Munooewerya okuxa enuku ya nakhuwo, nkincala moota enooneyaaya oloka, nyuwo pooti opa-...Siyensiya oopaka emosa, mukhanlyanyu opharulaka: erina muthinto mmosaru wa enaanelo, muthinto mmosaru wa murima, itthu imosaru enuku yinnunwe mmatta erinaaya, etthu emosaru. Mwaamuwerya ohela mulaporatooriyu, ni khivaaweryaneyanya ovirikanyihya emosa ni ekina: emosa enoopaka mukatthe wa nakhuwo ntoko ekina, emosa enoopaka muthinto mmosaru wa ithekeni sa nakhuwo. Masi enamuna emosa paahi mukhanlyanyu ovirikanyihaka, onkhala wuuheela. Ele mutthu opanke-awe, enikhala vaavo, enimuntta ni khenkhuma. Masi ele Muluku opanke-awe, ehaana eropo y'ekumi, eyo enoottthikela-tho okhala.

²¹⁵ Nyuwo pooti omutakiherya muKristu, nyuwo pooti orowa okereja ntoko muKristu, nyuwo pooti ohela nsina nanyu muliivuruni ntoko muKristu, nyuwo pooti wiitakaniha ni muromolelo ntoko muKristu; eyo yaamukhala yooreera, masi voohikhala wira Ekumi Ehinimala eyo eri mwa nyuwo Makampuusi ole Ooreera murima ovahalyawe Ekumi Awe, wira ovalaanihe...Okathi Muluku okhurunwaawe oPentekositeni, Owo aakhurunwe mpoolani mwa mooro ntoko Owo siiraly'awe oMwaako Sinayi, ntoko Owo saamwiirenlyawe Makampuusi oopacerya, Moise. Ni okathi Owo okhurunwaawe, Owo aahiikawanya mwa malumi a mooro yaakilaanthe vasulu va khula mmosa a yaawo, Muluku aikawanyaka Mmansawe mw'atthu Awe. Ni voohikhala wira muhaakhela yeeyo...Petru ohimnye wira "Eyo ti yawinyu, ni awaya an'inyu, yawaya ale ari ottaiwene."

²¹⁶ Apatthani, muhiweleleke khula ethale ya teyoloxiia, muyariwe vasya. Ni nyuwo mwayariwa, Erooho eri mwa nyuwo epantte ya Muluku, ni ennikhalela onamoona wira Masu othene

a Muluku “Ekeekhaii.” Mwaahikhalane musuwelelo, nrowe vano naakuvele munlyeya inama, Masu. Nrowe naakuvele mBibiliani, niirakamelihaka ikereja iya soophwanelihiwa ni masina a teyoloxiia, nirowaka munlyeya inama mw’ekeekhai, wa Masu a Muluku vaavo Mesiya oniisuwelihawe.

Ni muru ahu wowuurama, nivekele.

²¹⁷ Muluku Ootthuneya, ti yeeyo tu ensuwelaaka ohimya okathi ula. Nimmwaattamela Natale, iphiro ti soosareiwa n’alopwana ni athiyana, amiravo ni aximwali, esukhumaka, esukhumaka, ephavelaka othuma yoovahana wira yaakakhanye ni mutthu onrowa waavaha siiso. Atthu anci-ene aniisihana aKristu ari mphironi yaathumaka asikaro, aalikoro, wa soovahana sa Natale. Muluku, enkhala ntoko awo animoothanyani wiitho Wanyu, yaaxuttihaka an’aya ethale, ya oRooma, teyoloxiia a epakawa a Nikolawu Oowaarya, ethale emosa enkupaliwa vookhweya-vo ni olumwenku, ni awo anoomukhootta Kristu eekeekhai a Natale, Mwaapwittipwitthi eekeekhai.

²¹⁸ Muluku, miyo kinnivekela, ohiy’ula, wira nuuramihenlene muru ahu vatthayani Nyuwo onikuminhaanyu-vo, . . . Nyuwo mwaahimuleela Abrahamu emaara emosa, profeta-makampuusi muulupale, “Mukhume, Abrahamu, mwaalikele mithaaka siri mphareya.”

²¹⁹ Nto owo aahaakhula ni nuulumo, “Ti soohaalakeya, nkinkwerya waalaka.”

²²⁰ Vano Nyuwo khuhimya, “Nkawehani wirimu, mwaalake ittheneeri.” Ni owo aahisuwela wira eyo khiyaaweryaneya. Nto Nyuwo khimuleela, “Vano osuulu anyu onrowa okhala siiso.” Hiyo ninniweha mutthak’owo wa makampuusi-profeta owo “okhuma vatthayani v’elapo, mpakha ittheneeri sa wirimu,” wira hata okhalaka okhwa mw’erutthuni mwahu sinkhwa wira siniroihe vatthayani, yookhala Ekumi enwerya onivenxa mpakha muttheneerini.

²²¹ Ntoko saamuhimenry’anyu profeta Anyu muulupale Daniyeli, “Nto ale ammusuwela Muluku aya, mahiku ookiserya, anoovara miteko suulupale. Vano ale anaaxuttiha exariya anciene anoorowa waarya ovikana ittheneeri mahiku othene ni mahiku othene.”

²²² Pwiya Muluku, Mpattuxa Muulupale, Yoowo ahaareere otthuna orwa elapo ya vathi mwa mukhalelo wa Yesu, wira amusuwelihe ele Muluku aakhanlyawe. Ni mwaari Nyuwo paahi Ole aawerya okuxa ehukhumu ya mookhwaani, kahi Nlaikha, hata erantteliho khiyaawerya wira. Nyuwo mwaari Ole aawerya okuxa ehukhumu, nto Nyuwo paahi mwaawerya okumiha. Ni muryeene Erooho, khivaaweryaneya Nyuwo okhwa. Masi Nyuwo mwaahiipaka erutthu wira mukhwe; ni khukhala Mwaapwittipwitthi wira nwerye okumiha etampi ya

ale Oovuluxiwa Anyu, ale Nyuwo mwaarinaanyu waavuluxa ni Ephome Anyu Yeenyu.

²²³ Oh, ehantisi ti yuulupale saana, Pwiya, enaavira anci-ene voohikasooa. Wuupuwela: “Yehova mukhaani, ommaathale-ene mwaalyelya inama, Owo aahaana okhala ntoko mwaana. Yehova mukhaani, ooyariwa munikhomani. Yehova mukhaani, athweelaka ni anamwane mphironi. Yehova mukhaani, mwammiravo. Yehova mukhaani, mwanamwane a oxikola. Ni Yehova, Oowerya.” Nyuwo mwaahikuxa mapuro ala othene. “Nto nuumala, Yehova, Mwaapwittipwitthi. Yehova, Profeta.” Nto Nyuwo mwaahiphiyerya okhala sothene iya wira muhaawe ehukhumu y’etampi, ni onivaha Ekumi Ehinimala.

²²⁴ Munilevelele, O Muluku, hiyo, atthu oohaawa, ni soopattuxiwa soohiphwanela sa olumwenku ula. Hiyo ninniisoono okhala itthu sikhaani ohiy’ula, Pwiya, naasomaka etthu Nyuwo muniirenyanyu, ni vaakhaanixa eniiraahu voottikiha. Moota Nyuwo murwiye-anyu mahiku a ahooleli aalupale a etiini! Moota Nyuwo mwaatthunaanyu weemela ni wooniherya Masu a Atithi! Moota Nyuwo mwahaaisakalelinhe-anyu ni miyuupuwelo saya! Ni olelo enikhala ntoko wira khaavo onthuna weemela ni wiihana Masu nlelo “Masu,” ni ohisakaleliha. Hiyo ninnivekela, Muluku, wira munilevelele itthu iya hiyo nihinreere-ahu onyoonyeriwa. Ni munivahe ohiy’ula, mmurimani mwahu, niivahaka wa Nyuwo ntoko munlyelya inama. Ni hiyo noosuwela wira khula okathi Kristu Ookhomeliwa onikupaliwaawe, wookhala oyariwa vasya, yookhala epwittipwitthi enammala-ru oyariwa, wookhala wiipa Wirimu wa Malaikha. Mwaha wa natampi mmosa onrukunxa murima, Malaikha anniipa-tho.

²²⁵ Hiyo ninnivekela, Muluku, wira yaakhanle-ene amosa-amosa va ohiy’ula ahinoosuwelani Nyuwo ntoko Yoovaha y’ekeekhai ya Muluku, ntoko Moopoli aya, kahi ni muupuwelo wa mmuruni paahi, masi mwaha wo oyariwa vasya wo oyariwa ni Erooho Anyu, awo yaakhele Yeeyo naanaano va, Pwiya, ni miru sahu sowuurama. Nto aakhanle mmosa, Pwiya, ohirale ela, mirima saya saakhele ohakalala naanaano va, ni ephwanye ntoko amakampuusi a khalayi, munlyelya inama wa mmurimani mwaya, Masu, Mesiya; arrowa olipiheriwa wa awo ntoko Erooho Yoowaarya, Makampuusi muulupale a nihiku. Hiyo ninvekela ela mwa Nsina na Yesu.

²²⁶ Nirine-ene miru sahu sowuurama, ni miyo kinroromela wira ni mirima sahu sowuurama, nyuwo—nyuwo mwaamutthuna, munn’aka oophentiwa, munaamwi mwiraka mpantta wa ekereja. . . Ni kinroromela wira nkoosikulinhenei mwaha wo ohimya etthu kihimye aka. Miyo . . . Eri saana wira mpantta wa ekereja, naahaana wira yeeyo, masi, O munna, muhikupali yeeyo paahi, muhaana oyariwa vasya. Ti yeeyo Profeta-Makampuusi

Muulupale ohimye awe, “Muhaana oyariwa vasya.” Owo aamuleenle yeeyo teyolooku, “Muhaana oyariwa vasya.”

²²⁷ Ni okathi oniyariwaanyu vasya, kahi mwaha wo wira munnaamini paahi. Awo aniira, “Nyuwo muniyariwa okathi munaamini anyu.”

²²⁸ Masi Bibilia ohimye wira, “Xetwani onnaamini, nave.” Vano, nwehe, kehiyo yeeyo, owo musuwelelo.

²²⁹ Nyuwo muniira, “Ahe, miyo kinneettela makhalelo ooreera.”

²³⁰ Arummwa nave, masi awo khaayaayariwe vasya mpakha waakhela Erooho Yoowaarya. Awo hata khayaarukunxale murima mpakha waakhela Erooho Yoowaarya. Nyuwo munnuupuwela ohiyu ohinatthi olupattha...ahiiso wo olupatthiwani, okathi vakhani ohinatthi olupatthiwa? Yesu aahimuhimeerya Simoni Petru, “Mwarukunxa murima, vano mwaalipihe axinn’inyu.” Ni Petru aahimutthara Owo miyaakha miraru ni nuusu, ni aahiwoomola axetwani, aahaavoniha aretta, aahilaleya Ehapari yooreera, nave nlelo (voolikana ni Masu) hata khaarukunxale murima.

²³¹ Vano, mwaamutthuna enamuna yeeyo ya—ya Namitthaka mmurimani mwanyu ohiy’ula? Vakhala—vakhala wira vekeekhai munnitthuna Yeeyo...Khenvirikana etthu mutthu mukina onihimy’awe, Eyo ekeekhai, munna mulopwana, muthiyana. Koosuwela wira eyo ekeekhai. Mwaamutthuna, khula muru wuuramme-ene ni khula niitho niphunyiwe, kahi wa miyo, miyo ka mutthu paahi, munn’inyu, masi wa Kristu mwaamuvenxa ntata, mwiire, “Kinnaamini Yeeyo. Ni vekeekhai kinnimutthuna Kristu owo mmurimani mwaka, Kristu eekeekhai a Natale”? Mwaamuvenxa ntata vano? Muluku ooreeriheni. Ti yooreera. Muluku ooreeriheni, nave. Muluku ooreeriheni. Wulu, matata mapuro othene.

²³² Yiiraneye, munna; yiiraneye, murokor’aka; yiiraneye, mpatthani aka; musareye Erooho ya Muluku. Envirikana exeeni ele mutthu mukikna onihimyawe? Muupuwele, eyo ekumi anyu. Hiyo pooti hata ohikhala mulaponi voosiisu, khani—khanirina elipelo ya ekumi-tho ovikana emumulelo nrinaahu mphulani mwaha naanaano va. Khino khanirina emumulelo ekina, mahala a Muluku paahi. Nto eniphwanyiha-ni yooreera, hata mukhalaka yooreera murima ni exeeni...? Yesu ohimye wira, “Woohikhala wira mutthu onooyariwa vasya, owo khonrowa ovolowa.”

²³³ Vano, miyo kinnisuwela *masina* wa ele ekhanle oyariwa vasya, masi nrowe niwehe paahi etthu yaakhumelenle mBibiliani okathi awo yaayariwe aya vasya. Petru aari mulipa-oowaamini, arummwa yaari alipa-oowaamini, masi awo khaayaayariwe vasya mpakha vaamanlyaaya Erooho Yoowaarya waakhuruwela oPentekositeni. Vano, awo yaaniikoha etthu yaakhumelenle, nto Petru khwira, n’akina aya, “Nyuwo

atthu a Isarayeli, musuweleke ela; Yesu a oNasareti, mutthu aakupaliwe ni Muluku eriyari anyu ni ithoonyeryo ni miiriirya ni mitikiniho, Muluku opakalyawe ovira mwa Yoowo; Ola aavahereriwe, ni wiiwanana woopakiwa munvara ni matata a atthu ootakhala khumukhomela vamwiikimanyo, Yoowo Muluku omuhihimunxaawe ni hiyo n'anamoona Awe. Owo oomwarexa ela nyuwo munooaanyu ni muniywaanyu vano, ni eyo ti yoolikana ni Soolempwa."

²³⁴ Vano nto, vaaiwaly'aya yeela, murima waahaariipa vanci-ene, nto khwira, "Alopwana n'axinna, niireke exeeni wira noopowe?"

²³⁵ Petru aahiwaakhula wira, "Murukunuxe murima!"

²³⁶ Vano, mpatthani aka muKatolika mukilaanthi va, kinaasuweleaka axexe wala athanu a nyuwo mukilaanthe va. Miyo kaavaanyihana yeela ni namukuttho anyu, khino kahi namukuttho *anyu*, masi mmosa wa anamukuttho aKatolika, owo khwira, "Yesu oovaha oweriya wo olevelela itampi, 'Ale onrowaanyu waalevelela itampi, awo anooleveleliwa; ale ohinrowaanyu waalevelela itampi, awo khanleveleliwa.'" Eyo ekeekhai. Masi nrowe niwehe moota owo iiraly'awe, moota arummwa yaatthanre-aya yooruma Awe, kahi voolikana ni enamuna a—anamukuttho siniiraaya olelo.

²³⁷ Masi moota siiralyawe namukuttho oopacerya, mwatthuna vale omwiitthana owo siiso, Petru, aarina ihulelo sa Momweneni, owo ohimye wira yiiriweke sayi? Owo iirale, "Murukunxe murima, khula mmosa a nyuwo, mpatisiwe mwa Nsina na Yesu Kristu wira muleveleliwe itampi, nto munimwaakhela yoovaha ya Erooho Yoowaarya. Okhala wira natiri t'awinyu, ni awaya an'inyu, n'ale ari ottaiwene, othene ale Apwiya Muluku ahu antthunaaya owiitthana." Nto vakhala wira Muluku nlelo onniitthana, musuwelelo mmosaru ti wawinyu nyuwo mwatthara-ru elepelo emosaru ya murette. Muthukumano waaminiki-ru Yeeyo, ni miru sanyu soowuurama, mwiire, "Amen." [Muthukumano oniira, "Amen."—Mol.] Vano, etthu p'itthu voohikhala Yeeyo ti yoovirikana ni Masu, ni kahi voolikana ni Makampuusi.

²³⁸ Pwiya Yesu, awo ari mmatatani mw'Anyu vano. Miyo kinvekela wira khula murima wootthukuwa ohiy'ula ohikhalanne Kristu, Mesiya (ni Kristu ti Masu, Masu ooreerihwa owooniheriwa), ni sakhala mirima soothukuwa va ohiy'ula sibirina Mesiya owo, Yoovaha y'ekeekhai ya Natale, Yoovaha y'ekeekhai ya Natale ekhanle, Muluku ovahalyawe olumwenku, ni khooniherya Yeeyo molumwenkuni ni amakampuusi, ya Mwaapwittipwitthi Awe, Elivelo ya etampi, nto murima owo wakhala wootthukuwa ohiy'ula, muhele mwemmo, Pwiya, Masu a Mesiya oolelo. Hiyo ninaavahererya wa Nyuwo mwa Nsina na Yesu Kristu, Mwan'Inyu. Amen.

239 Munnimpheenta Yoowo? Munnimwaamini Yoowo? “Mphavele Omwene wa Muluku toko, ni exariya Awe, itthu sothene sikina munimwaacereriwa.”

240 Apatthani, nihinatthi olaxerya, kinthhuna kihimye ela. Imaara sinci-ene, miyo nkiniwiwa oratteene. Kookhalana Mutthaka onikhuma wa Muluku, ni kihaana olaleerya Mutthak’owo mwa sothene. Miyo koosuwela wira Owo ti woohiiwiwa oratteene. Vahaakhanle siiso, weeso khuwaarowa okhala Mutthaka wa Muluku; Khivaaweryaneyya okhala. Wookhala ohoverya wunci-ene olelo wira ohikhala woohiiwiwa oratteene. Miyo kinnaamini wira Muluku ookhalana atthu mwa khula muromolelo ni mutthenkeso wa molumwenkuni, ni kahi wira miyo kirina nthowa ni axinn’aka. Miyo kaahirwa oTucson nno, iyaakha tthaaru sivinre, ni kaahikhalana muthukumano ni nyuwo arumeyi wu wa Munna Gilmore, ni khukohiwa, miyo “kaarwiye nno opacerya ekereja?”

241 Miyo khwira, “Nnari, mulopwana. Kirwiiye nno wira kookhaliheryeni *nyuwo*.” Masi nkinatthi ovekeliswa nlelo, mwa miyaakha miraru. Masi vamosaru, kiri nno wira kookhaliheryeni. Miyo kiri nno wira kivarane matata ni nyuwo, kahi wiitakaniha mmitthenkesoni ni nyuwo, masi ovarana matata ni murima ni nyuwo mwa Masu a Muluku, wira kiphavele olaleerya Ehapari yooreera wa khula munepa orimeenle ni khula mutthu ori vathi va olavula wa masu ahu.

242 Miyo kinniivaha mmansaka wa Muluku, ohiy’ula, ni murima aka wothene, ni sothene siri mwa miyo. Nkirina yinci-ene yo ovaha; Nkikhanle oruuhaka erupani, emiira, ni eweero, okhala wira nkirina. Masi sothene kirinaaka mwa miyo Muluku okivahalyawe, ekumi ila, miyo kinvahererya wa Yoowo emaara ekina ohiy’ula, vasulu va munlyelya inama mwa Masu Awe mmurimani mwaka; ni kinnimmanela natiri Yoowo, wira kinookhala ni Masu awo, Owo akiththuniheryaru okhala mwaakha mukina, ooromeleya saana sikhhanle-aka weemelaka; olaleya othene Ala, ni mwaamini othene Ala; tivo, mukikhaliherye, Muluku. Munimwiira yeeyo ni miyo?

243 Munaakhele, Pwiya. Hiyo ninnaakhela Yoovaha Anyu ya Natale, Mesiya, Masu oottikittheliwa anlipiherya Mukhalelo Anyu ni hiyo, Pwiya, voohicala eyaaminelo wala muromolelo. Hiyo ninniphwanya olelo, olumwenku onoophomowa kapattikapatti, ni va Mesiya muulupale eemenle ni matata Awe oowookowa: Yesu Kristu mmosaru nsana, olelo, ni mahiku othene, yoowo ommanne anatiri, wira mahiku ala ookiserya, ekereja yaarowa okhala yoothokihiwaxa mpakha yaarowaaya okela mwa Lawotiseya. Ni hiyo ninnoona olelo, Pwiya.

244 Niireke exeeni, Muluku oothuneya? Kiireke exeeni? Mukikhaliherye miyo ni amakampuusi akina, Pwiya, mulaponi mothene, amakampuusi a Masu, wira nilaleerye Yaawo,

Pwiya, mwaakha ola onoorwa. Munikhaliherye, Pwiya, hiyo ninnivekela. Munivahe Ophenta Wanyu ni Erooho Anyu ni Waarya Wanyu. Hiyo ninniivahererya ohiy'ula wa Masu Anyu ni wiitthana Wanyu. Mwa Nsina na Yesu Kristu, hiyo ninnaakhela Yoovaha Anyu ya Natale: Masu a Muluku oowiipaka erutthu mwa hiyo. Amen.

²⁴⁵ Miyo okisivela masipo a ekereja. Paulo oohimya, mBibiliani, “Kaaipaka, kiniipa mwa Erooho. Kaalaleyaka, kinlaleya mwa Erooho. Okathi miyo. . . sothene siniiraaka, kiniira sothene mwa Nsina na Yesu Kristu.” Vano, okhalaka wira Ela yaahikhala yoowoceiha wa nyuwo, ni miyo—miyo kinnooxukhurelani, miyo kinoorwa ni Mutthak'ola, imaara sikina enikhala ntoko okinanara ohimya Yoowo, masi nnakhala vo miyo ki—kihaana ohimya, axinna. Kaahiire, ka namirima miili. Kaahiire, ka namawoka a muupuwelo aka yoomi, ni wa—waamini waka Masu a Muluku. Kihaana wira, kahi wira kikhale oovirikana, masi okhala oororomeleya wo wiitthaniwa waka. Ni kintthuna kookhaliheryeni nyuwo othene, kintthuna kiire sothene sinweryaaka.

²⁴⁶ Vano nrowe niipe nimosa wa masipo maalupalexa a okathi wotheene, miyo okisivela saana, *Miyo Kinnimpenta Owo*. Moosuwela, kookupali wira vaakhanle wira hiyo othene naanimphenta Owo, naamwiira etthu Owo onivekenly'awe wira niire. “Munikiitthana sayi Miyo, ‘Pwiya,’ nave muhiiraka itthu sinoorumakani wira? Munikiitthana sayi Miyo, ‘Pwiya,’ vano nto muhiiraka ele enoohimeeryakani wira mwiire?”

²⁴⁷ Mwaamwamputi omwiiwelela makampuusi onilinvwa aarowa ohimya wira, “muhele nsina nanyu muliivuruni, ni mwiitakanihe; mwaakhele ekomunyawu ela, muhimye *ela*, ni khiva mulattu,” okathi Makampuusi Muulupale Mwaneene iiraly'awe “mutthu aahiyariwe-ru vasya khokhanle woonaka Omwene wa Wirimu”?

²⁴⁸ Ni nkaaweheni mateyooloku ale owiixuttihiwa a mahiku ale, owiixuttihiwa! Oowaarya? Makhalelo ooreera? Hiyo khanrina hata etthu yo olikanihana ni yeeyo olelo, enamuna awo yaakhalaaya. Nto Makampuusi Muulupale aawiiitthanne okhala exeeni? Iirale, “Nyuwo mwa a atith'inyu xetwani,” okhala wira awo khaya. . . Awo yaanisuwela Masu, masi Masu a nihiku nikina, kahi Masu a nihiku *nenle*.

²⁴⁹ Vakhala wira awo yaasuwenle okathi wa Nowe, eyo ti yooreera, owo waari okathi wa Nowe; masi khiwaarowa ovara etthu okathi wa Moise. Ni okathi wa Moise khiwaarowa ovara etthu okathi wa Kristu. Munnona? Okathi wa Luteru khuwaarowa ovara etthu okathi wa Wesley. Okathi wa Wesley khuwaarowa ovara etthu okathi wa Pentekosite. Ni Pentekosite iirale etthu emosaru akina aya yiiraly'aya. Vano, taani okikhalihenrye mahiku avinre? Kihookohani.

²⁵⁰ Nikukhu na malaxi naakhumaka, exeeni iyo? Exeeni... nikukhu na etriku naakhumaka. Yesu irale, “Epyo ya etriku yaahimorele-ru vathi.” Exeeni eniireya okathi enuku ya etriku...ahiiso etriku yamorela vathi? Etthu yoopacerya enkhuma ninkhala nikukhu naamukhaani. Eyo—kahi ntoko enuku yaamonre. Nwehe ephattu. Kehiyo ntoko enuku yaakenle, masi ti namakuxa Ekumi ya enuku. Exeeni erwiye...

²⁵¹ Mutthu ule oohaamini olempe eliivuru ile yoosuweliwa paahi, *Muluku Oomaala*, ehimnye wira, “Vaaweryaneya sayi okhala Muluku aawerya otthukula Ephareya Yooxeerya, ni weemela miyaakha ikonto sene sa okathi wa epiphi ni owoona axinamwane okhuuriwa ni amwatto, ni atthu othomeiha mmiikimanyoni, ehitonko wiiviwa mw’areenani ni itthu, nave ohitoko otthukula eyano Awe?” Moone, Masu muupululo.

²⁵² Etriku ele, okathi etriku ile y’ekeekhai epacenryaya woopaceryani, yaahinvonyerya Muluku. Nto vookiserya yaahirwa Etriku, mulipa-owooniherya eekeekhai a Muluku, oonihenrye Masu Awe othene mpakha Owo vaakhanlyawe Masu. Vano Muluku khunvaha Mwaakameliwa oPentekositeni; masi Mwaakameliwa ole aahimorela vathi moovirani mwa okathi w’epiphi, siiso siiralyaya etriku y’ekeekhai, Eyo yaahimora. Nto xeni yahaaweryaya wira etthu? Okhala wira yaaroovithiwa vathi v’etthaya, yaahaana wuntta ehinatthi oruaha ekumi.

²⁵³ Masi vale aahirwa namukuttho mmosa emara emosa, iitthaniwa Martinho Lutero, ni yoowo yaahikhuma Masu a Ekeekhai: “Naxariya onookhala mwaha wo waamini,” vo naahirwa nikukhu; vano nikukhu nikina naahitthara, Zwingli, vano nto khurwa Kalvino ni Knox ni siiso erowaka.

²⁵⁴ Naanaanoru, eyo yaahirukunxa nikukhu naya, khukhala ecera. Vano, yaanilattana vakhani ni yeeyo, masi nlelo khiyaari etthu y’ekeekhai yaamorenle mutthayani, nuumala khurwa Wesley. Mwa Wesley khurwa ekereja Metotista, mwa ekereja Metotista khurwa Nasareno, Axinna Oowiiraana, ni sikina. Eyo yiirale exeeni? Eyo yaahimora—tho khwiima, enikhala ntoko enuku y’etriku y’ekeekhai vano, Pentekosite.

²⁵⁵ Vano, nkanweheni Yesu, mwa Matewu 24:24, “Nihiku nookiserya, irooho soopiili sinrowa okhala soolattana mpakha enrowaaya owoototha ale Oothanliwa, vaakhanle wira vaaniweryaneya.” Vano, enuku ele ya etriku ekhumalyaya, khula mulimi a etriku onnisuwela wira yaari yoolattanaxa oratteene, ni enuku ya etriku. Masi mukilaathi mukuxe mmatatani, mutthukule. Khiyaavo etriku mmo, nlo nikatamphe. Masi ottuli epante y’ottuli, vathi va emikroskoopiyu munoowerya woona ephuwo ekhaani, vo enrwa enuku. Vano nikatamphe nihaana wira exeeni? Okhapelela enuku, nsuwa nooviha naamwiiva, nlo ninkhapelela enuku mpakha enuku ottokottha. Vano nto enuku yattokottha, nikatamphe nnimwiivalaaniha ni yeeyo. Masi,

nyuwo mooweha, wira enuku eyo nto enkhuma, ehaana okhala muthinto mmosaru wa enuku yaamorenle mutthayani.

²⁵⁶ Numala muhakalaliho wa Lutero, waarwiiye mutthenkeso. Numala muhakalaliho wa Wesley, waarwiiye mutthenkeso. Numala Alexander Smith, John. . . Alexander Campbell, John Smith, othene aya akina, waarwiiye mutthenkeso. Nuumala Pentekosite, waakhala vekeekhai ntoko etthu y'ekeekhai, masi khukhala mutthenkeso. Eyo yiirale exeeni? Erimwiivalaaniha.

²⁵⁷ Naahikhalana iyaakha muloko ni thanu sa muhakalaliho, sahaatonko osuweliwa mwa wahala othene. Ni nwehe, mwa muhakalaliho ola wa iyaakha muloko ni thanu, woophiya mulaponi mothene, nave nnakhala mutthenkeso mmosa khotekiwe wa Yoowo. Waari vayi? (Waahipacerya epula yookiserya, waahikhwa mu. . . naanaanoru, waahikhwa.) Khonakhaleke mutthenkeso otthanre Yoola. Mwaha wa xeeni? Ti enuku Ene, khivanweryaneya okhala-tho. Nto nikatamphe vano ninimwiikumiha, vooikhaliherya, khaavo onootthunani. Mwaha wa xeeni? Ehaana okhala Siiso.

²⁵⁸ Mwaha wa xeeni ekereja ele ekelaka opwehiwa vale? Wira ekhaliherye Yeeyo. Vaavo. . . Taani aarowa okhaliherya? Patista xeeni, wala Prespiteriyano, wala Luteraano yaarowa okhaliherya ekampaanya y'ovoniha wa Muluku? Vano Ekeekhai yakhuma, exeeni eniiraneya? Kahi nikatamphe; masi Ekumi enookhuma munikatampheni, ekelaka muhina mw'enuku, Ekumi y'ekeekhai yooloka. Mutthenkeso onihala vaavale, onookhwa, siiso ntoko oniirakaaya mwa khula okathi, oniira etthu emosaru. Nyuwo mookhuma mwa yoowo, iyaakha miloko mithanu sivinre, vano khutthikela-tho mwemmo! Masi Ekumi y'ekeekhai entthara enuku, hiyo nri okathi wookiserya, axinna.

²⁵⁹ Eyo yiivalaanihenrye-ni? Wira eruuhe enuku ohoolo wa Mwaana, wira ottokotthihe enuku mwa ettokothelo ya weero wa Mwixuttihi. Eyo yiivalaanihenrye-ni? Wira, etannye oriipiwa murima, maithori, wira ehikhalase ohoolo wa n-s-u-w-a, masi M-w-a-a-n-a, wira sittokotthihiwe mwa Ehapari yooreera yoomalela, wira yooniherye sothene Yesu Kristu olaihenryawe mBibiliani. Yookhala Erutthu envenya olelo eriyari y'atthu. Ni khasinrowa-tho okhala hata mitthenkeso, enrowa mwa Lawotiseya okhanle thaaciri. Inamuna xeeni mutthenkeso okelelanne-aya ohoolo? Itoolare imilyawu sene, ni imilyawu sene sa minepa.

²⁶⁰ Nto Makampuusi aarweenle exeeni? Wira aavuluxe axinn'awe mw'epotthani. Miyo—miyo nkisuwenle; Muluku, akhale ni hiyo, anikhaliherye. Musome Masu! Mwaavyaavye Soolempwa! Mwa Seiyo hiyo ninuupuwela wira nookhalana Ekumi Ehinimala, nto ti Seiyo sinkhalela onamoona Ekeekhai. Moone, Muluku oovaherya Masu Awe khula okathi. Okathi ula kweekwe. . .

261 Yesu ohimnye exeeni okathi Owo oruuly'awe? Owo aahaahimeerya atthu ale, "Nyuwo anawoothe! Nyuwo muntteeliha ixiri, ni waatekela ikhapuri maprofeta, nave axitiithi anyu ti yaahenle-mo. Ni nyuwo mw'ana a axitith'inyu. Ni miteko awo sivanryaya, ni nyuwo munoovara." Kweekwe enikhala emosaru, axinn'aka.

262 Masi okathi Yesu onrwaawe nihiku nlo, Makampuusi Muulupale a ipwittipwitthi sa oPentekositeni mwa Lutero ovira okathi wothene, okupanli Waarya okathi waarwaaya ni anamakuxa, kahi amukupanli namakuxa, akupanli Waarya, moone, akhumme, Owo onrowa orwa wira avuluxe. Kinnitteeliwa murima saana osuwela wira Owo onnoorwa-tho. Oh, munimwaalakiwa ni nikhuru Nawe? Munimwaalakiwa? Eri enamuna emosa paahi yo wira, kahi mwaha wo wiitakaniha mukereja, masi mwaha wo oyariwa mwa Yoowo. "Ni othene ole Atithi akivahaly'aya, onimoorwa wa Miyo, ni khaavo onwerya orwa vahikhanle wira Atithi Aka anoomwiitthana." Moone, ti yeeyo tu, mukupali Yeeyo. Owo. . . Eyo ti Yoovaha emosa paahi ya Natale ensuwelaaka, ti yoovaha ya Muluku Owo ovahalyawe olumwenku, Mwan'Awe mmose-ene. Ni Owo mmosaru, nsana, olelo, ni mahiku othene, Masu. Munnona? Mmwaamini Yoowo nihiku nla, omalela wa Bibilia.

263 Okathi isiiri iye thanu na piili . . . Mwa Okathi iye Mithanu na Miili sa Ekereja, saahikhala isiiri thanu na piili soowiipithiwiwa. Miyo koolepa eliivuru ya Yeeyo. Nto teyooloku mmosa muulupale aahikiirela woohikhala khalayi, khwira, "Munna Branham. . ." Munnoona moota Satana onrowaawe weererya wookumihani mphironi? Owo khwira, "Munna Branham, moosuwela? Kookupali wira Apwiya anoowuupululelani etthu enrinaahu wira voottharana. Eri wira. . . enrowa okhala esiiri yuulupale yiiipithiwe vathi va Ikanyeryo iya Thanu na piili."

264 Miyo khwira, "Nnari, kahi yeeyo, munna."

265 Owo khwira, "Enrowa okhala etthu hata ehinlempwe muhina mwa Masu."

266 Miyo khwira, "Nnari! Nnari! Munooliyala wira, 'Ole onrowa waacererya nuulumo nimosa, wala okumiha Nuulumo nimosa.'" Moone, Eyo eri mwemmo, masi anamarehererya aroovonya woona, awo khakhanle okathi woophiyerya wira yoone.

267 Ni okathi woomala vano, hiyo nri vaava va mwa Lawotiseya. Ni muupuwele, okathi wa Lawotiseya, Owo aari ota w'ekereja, amanaka nsele, atthunaka ovolowa-tho: Hawa aahimukumihana Atamu awe. Muluku, anikhaliherye. Nirowe epantte ekina ya muttethe wira nimphwanye Yoowo. Nirowe nihaawe ota wa mikhora ni Yoowo. Nirowe ni Yoowo mookhwaani mw'Awe, moovithiwani mw'Awe, ni woohihimuwani Wawe; maana Owo mmosaru nsana, olelo, ni mahiku othene.

268 Nrowe niipe nsipo nimosa nihinatthi okhuma. Munimwiira? *Miyo Kinnimphehta Owo*. Munoonirumihela, munna? Akavi ansuwela nsipo na khalayi? Miyo...Mwaatonko ene okhala mmithukumanoni, miyo okisivela.

269 Vano nrowe niphunye maitho ahu, nimuupuwele Yehova. Khaavo aaphwanela, khaavo aawerya wira woohikhala Yoowo. Ni Owo aahikhuruwa, khukhala mwanamwane mwaamukhaani. Owo aarwiye, ntoko mmiravo. Owo aahikhala kalapinteero, namuteko. Owo aahikhala Mwaapwittipwitthi, Owo aahikhala mukuttho. Owo oohihimuwa vooxinta, Yehova. Ni ntoko Moise saakumihale-awe ntata nawe vatthirima vawe naari vamurimani vawe, Muluku aakuminhe ntata Nawe vatthirima Vawe (Esiiri Awe) Mwan'Awe iiviwe ni eretta ya etampi, yoohivoniwa; ni khutthikela okeliha vatthirima, ni khukumiha khuwookolelani nyuwo ni miyo: "Yesu Kristu mmosaru nsana, olelo, ni mahiku othene."

270 Nkanweheni Yoowo vano.

Miyo kinnimphehta Owo, miyo kinnimphehta
Owo
Okhala wira Owo t'opacenrye okiphenta miyo
Nto oothuma woopowa waka
Vamwirini w'oKalvario.

271 Akavi ansuwela wira aahaana okhala makampuusi, mwiire "Amen." [Muthukumano oniira, "Amen."—Mol.] Aahaana... Xeeni okhala makampuusi? Aahaana okhala. Vano niipaka eversu emosaru yeela emaara ekina, mookolele ntata vameesa. Aakhala aMetotista, aPatista, aLuteraano, aPrespiteriyaano, aKatolika, ni othene, akilaanthe va ohiy'ula. Nvahane matata, mwiire, "Mpatthani nawetta, miyo kinnitteeliwa murima okhala va ni nyuwo, ohiy'ula." Mwaaleele etthu. Mwiire, "Muluku ooreeriheni," nivahanaka matata mmosa ni mukhwaawe vano. Niipaka-tho yeeyo vano.

Miyo... [Nipuro vahiitthu mufiitani—Mol.]
. . . woopowa waka
Vamwirini w'oKalvario.

272 Vano nrowe niphunye maitho ni nivenxe matata, nimwiipele Yoowo.

Miyo kinnimphehta Owo, miyo kinnimphehta
Owo
Okhala wira Owo t'opacenrye okiphenta miyo
Nto oothuma woopowa waka
Vamwirini w'oKalvario.

273 Nto vano, Muluku khorina mukhalelo. Tivo, nrowe nuurame muru niipaka muhina vano, ntoko axinamwane, nyuwo mwa aana a Muluku. Muhiwehe ele olumwenku okhanlyaya wuupuwelaka, nyuwo munookokhorela vano, mmukokhorelaka Kristu. Muuramihe muru nto mwiipe muhina-muhina. [Munna

Branham oniipa muhina-muhina *Miyo kinnimphenta Owo—Mol.]*

274 Khamuniisoono okhala othene ookukutthiwa? Ntoko Etthu ekukunthe ohoverya wothene ni olumwenku mwa nyuwo? Munnoonna siiso? Nvenxe matata, “Miyo kinnoonna okukutthiwa saana. Kinnoonna voovirikana. Kinoona ntoko wira kaalya mmatatani mw’Awe. Kookhalana . . .” Ntoko munna va ohimnye wira, “Yolya, Yolya ya Makampuuusi, Yolya ya ipwittipwitthi.” Awo Masu.

275 Ipwittipwitthi sa Muluku sinlya Yolya Awe, “Mutthu khonkhala mukumi ni yolya paahi, masi ni Masu othene ankhuma mwaano mwa Muluku.” Ni ela ti Yeeyo, Bibilia. Hiyo ninlya Masu othene, kahi Masu mamosa-mamosa paahi, masi Masu othene ankhuma. Oh, eyo khenophentihani Yoowo? Wuupuwela wira vano nookhalana Ekumi Ehinimala! Kahi ninrowa okhala, *naanaano va* hiyo n’ana a Muluku. Kahi hiyo ninrowa okhala, *naanaano va!* Ni nikilaanthe vamosa mapuro a wirimu *mwa* Kristu Yesu. Ni etelevisawu yuulupale, enihimya wira nookhala niwipi na eeteri niniwiiriha atthu (mutthu oneetta mukwaha mulaponi) osuweliwa ni e—eteela ya etelevisawu. Masu maalupale a Muluku, ni Erooho ya Muluku ekuxaka Masu a Muluku, ennimooniherya Yesu Kristu mapuro a wirimu wa ipwittipwitthi Sawe, wira Owo mmosaru nsana, olelo, ni mahiku othene. Owo kahi oothamaleya? Oothamaleya! Muluku ooreeriheni.

276 Vano nrowe nivenye okathi vakhani paahi. Mookhalana mutthu wo omureeriha? Vano, muupuwela, okathi wa Natale, mmukokhorele Pwiya Yesu. Mmukokhorele Yoowo mwa Owerya w’ohihimuwa Wawe. Ni kakhalkhala kiweryaka wookhaliheryani, nyuwo, pastore anyu, ekereja anyu, wala etthu p’itthu, ohiyu khonakhaleke wooriipela, epula khenrupaxaka.

277 Ohiyu uwo (ookhala muhano mmosa eemenle va) Nkaareerane muteko, n’aretta n’itthu mpakha . . . Aahikhala muthiyana mmosa a miyaakha miloko mithanu na miraru n’itthu waampwetiye muupuwelo awe, ni aarina . . . owo uupuwela wira aahikhala mwaana wala etthu, waampwetiye muupuwelo awe. Ni Billy, khukiitthana, oskritooriyu, khwira, “Paapa, munniwerya?”

278 Miyo khwira, “Nkinwerya naanaano va. Aakhala atthu . . . Nkinwerya wira tu.”

279 Owo khwira, “Paapa, munniwerya ovekela? Miyo kinimwaaleela wira munoovekela.”

280 Miyo khwira, “Ayo.” Nto okathi ene yoowo owo khwiisuupuwela. Khurupa, khuvenya ni mukhalelo awe wooloka; khimukhuura mwalyakhu, voomalela, ni muupuwelo woolikana. Mutthu uwo eemenle va akhalelaka onamoonna yeeyo okathi vakhani ovinre.

281 Munna Mack, koomoona owo va okathi vakhani ovinre, nipuro nlo mukereja. Owo ori vaava, mmosa wa mapastore, pastore a vaavo. Munna mmosa oophenteya saana, ni kweekwe kinnimphentaka Munna Mack okhuma okathi opacenyaka muteko. Ni nto kimusuwenle. . .

282 Nto miyo kaari wu oColumbia Britaanika; nto wira kiwooniheni paahi moota Muluku onrowaawe ovara sothene oratteene. Kiira kiwenle ekhavallo, ni kaatthikela mothakoni weiwo keettihenrye-aka nikhuru nothene na aHinti wa Muluku; ni othene aya yaarukunxale aya murima, ni khumwaakhela Yesu.

283 Ni oprofeta aaleeliwe mmiravo Muhinti aamurimeenle pooni awe, miyaakha miili sivinre, khimuleela nipuro aakhanlyawe ophwanyaka, erakamelo ya nipuro yaarowaaya okhala, ni nipuro pooni aarowaawe weemela. Ame awe akhwaaka eretta ya murima. Awo yaahivona ni yaahoopowa. Nto mmirav'ola, aviraka paahi vaavo khoona, ni asuwelaka wira owo. . . ekhavallo awe yaaphwanyiwe siiso ntoko saaleeliwaawe, ni sothene.

284 Khanivo hata Nuulumo nimosa Apwiya atonko aya olavula. . . Kamukoha khula mmosa a nyuwo, "Awo. . . nyuwo mootoko owiwa Awo ohimya etthu, atonko aya okileela wira kooleleni, ehintonko okhumelela voolikana siiso?" Yaari ekeekhai, mwiire "Amen." [Muthukumano oniira, "Amen."—Mol.] Munnona? Munnona? Vekeekhai, khenavonyeke hata emaara emosa.

285 Nto Munna Mack aarimummaathi ahalelaka okhwa, khwiiraneya amwaar'awe omwiiwthana Billy. . . amwaar'awe mwan'aka, ni khuhimya. . . khukoha nipuro kaaryaaka; mwaamuthiyan'ole oophenteya ni. . . mwaar'awe. Nto owo. . . Nto mwaara a mwan'aka khwira, "Awo ari ottaiwene onkela epheyo wa oColumbia Britaanika mukwaha wo oxaya."


286 Nto voosiis'ule, mwa enamuna emosa, miyo—miyo—miyo nkaawerya weettiha ekhavallo ele. Vano nto Billy khwira, "Kookupali wira kinoolikarela-tho owaani." Nto owo khurwa nipuro n'olikari. Ni khurwa yaakuvaka, muhinti mwaamukhaani eemenle vale, mukhaani. . . aarina pooni, khwira, "Munna Mack orimummaathi onihalela okhwa, ni onoowiiwthani."

287 Miyo kikhuruwa, khurwa mmirini khukokhora. Miyo khwira, "Muluku Ootthuneya, ottaiwene, imiilya ikonto tthaaru mulaponi, elapo ya nsuwa ya wArizona, oTucson, ori munn'aka, ni orimummaathi onihalela okhwa. Munoomukhaliherya?"

288 Etthu emosa khulavula ni miyo, "Sothene siri saana."

289 Nto okathi orwiiyaaka wa Munna Mack nihiku nlo, olavula ni yoowo, ni khimukoha, "Ewoora xeni yiiraneieye aya?" yaari ewoora ene yeeyo naaronwe ahu ovekela.

²⁹⁰ Oh, Owo...Owo kahi oothamaleya? Owo mmosaru nsana, olelo, ni mahiku othene. Miyo nkireere otteeliwa murima osuwela wira kinkhala Ohoolo wa Mwene.

²⁹¹ Nrowe nuuramihe miru sahu vano, nto munna mmosa oottittimiheya ori vaava, munna mmosa misiyonaariyu, mpatthani aka, mempuru a Asempeleya a Muluku, mwamunna mmosa ooreera murima va. Kinimwiihana, "Creechy." Owo aalavula itthu sooreera. Munna Creech, miyo kiniwiitthanani siiso. Miyo nkinsuwela etthu yo ohimya, nyuwo mwa munn'aka murumeyi ntoko miyo mohaawani wa Yesu Kristu nihiku nla nookiserya. Muluku ooreeriheni. Ni kinoona wira Munna Tony ohimye wira munrowa olaxerya muthukumano okathi ula, nuuramihaka muru. Vaareera, rwaakani. 

64-1221 Xeenl Akelaka Okhala Amakampuusi
Ramada Inn
Tucson, Arizona wAmerika

EMAKHUWA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyawe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org